

অক্ষকান

মাহেকীয়া সাহিত্য সংকলন বিষ্ণুপ্রিয়া মণিপুরী

৬ষ্ঠ বছর, ৯ম সংখ্যা
১৬ই ভাদ্র, ১৪১৬ সন

6th Year, Vol - IX
31st August, 2009



শুভ উদ্বোধন
১ মাঘ, ১৪১১ সন

সম্পাদক
মণিপ্রকৃষ্ণ
ভাঃ বনসেবা (অবঃ প্রাপ্ত)

APARUPA

A monthly, Sahitya Sankalan, Published in Bishnupriya Manipuri Language, Printed at Angelica Imprint, Harabala Market, G.M.C.H. Road, Guwahati - 5

Editor

M. K. Sinha, IFS (Retd.)

Publisher

Shankar Sinha
Rajgarh Road
Guwahati - 7

Cover Designed by

Angelica Imprint
G.M.C.H. Road, Guwahati - 5

Copy Right

M. K. Sinha, IFS (Retd.)
Guwahati - 7

Price

Rs. 25.00 only.

প্রচ্ছদপট :

মুঙৰ মলাটৰ ফটো
পিঠিৰ মলাটৰ ফটো
শ্রীমতি কল্পনা সিংহৰ প্ৰযত্নে।

সম্পাদকীয়

উত্ত নো ধিয়ো গো অগ্রাঃ পুষাধিক্বেবয়াবঃ। কৰ্তা নঃ স্বস্তিমতঃ।
মধু বার্তা ঝাতায়তে মধু ক্ষরন্তি সিন্ধবঃ। মাধ্বী নঃ সন্তোষধীঃ।
মধু নক্তমুতোষসো মধুমত্ত পার্থিবং রজঃ। মধু দ্যৌরন্ত নঃ পিতাঃ।
মধু মাম্মো বনস্পতি মধুমা অন্ত সূর্যঃ। মাধ্বীগীবো ভবন্ত নঃ।
শং নো মিত্রঃ শং নো বরুণো শং নো ভবতুৰ্যমা।
শং নো ইন্দ্রো বৃহস্পতিঃ শং নো বিষ্ণুরুক্ষমঃ।

হৃদি-তন-মন সর্ববন্দ্রিয় আকতা করিয়া কোনো মহৎ কর্ম সমাপনর প্রার্থনা দ্যৌওরাং জানেইলে দ্যৌয়ে ঐ প্রার্থনা হুনে দিতারা বারো প্রার্থীর মনস্কামনা পূরণ করে দিতারা। ঔহানে, দ্যৌরে দেব বা দেবতা বুলিয়া মাংতারা। দশগিরিগীথানী যেপেই তিলেতারা, ঔফাম উহানরেউ দেবলোক বা দেবস্থান বুলতারা। ঐ দশগিরিগীথানী ঔতারেউ দ্যৌ বুলিয়া নিংকরতারা। এসাদে প্রচলন আমরাং আছে। বৈদিক যুগেউ আছিল।

শ্রীশ্রীরাধামাধবজীউ সেবাপূজা পরিচালন সমিতির ১২৯ তম বার্ষিক সাধারণ অধিবেশন ১৫, ১৬, ১৭ ই মার্চ ২০০৯ ইংরেজীং গৌহাটীং অনুষ্ঠিত অগেলগা। ঐ কর্ম উহান, নানা কার্য কারণে ২৯শে ফেব্রুয়ারী পেয়া প্রায় নানাং লেপছিল। ১ লা মার্চ, কেন্দ্রীয় কমিটিংত অধিবেশনর প্রোগ্রাম পানার পিছেদে কর্মহান গৌহাটীং অনুষ্ঠিত ঐতে বুলিয়া গৌহাটী আঞ্চলিক কমিটিয়ে লেপছিল। অবশ্য, কর্মহান অনা-নানার আচুল ঠেলাং থাইলেউ, প্রারম্ভিক কাম-কাজতে ধিমা-তেতালাং চলিয়া আছিল। কর্মকর্তায় অহরহঃ দ্যৌওরাং, কায়-মন-বাক্যে প্রার্থনা করিয়া আছিল, এমারী অধিবেশনহান গৌহাটীংত না থেয়ক। কেন্দ্রীয় কমিটির দশগিরিগীথানীরাঙো সর্বান্তকরণে হেইচা করেছিল, কর্মহান গৌহাটীতেই অক। দ্যৌয়ে বারো দ্যৌসাক দশগিরিগীথানীয়ে, গৌহাটী বাসীর ঐ প্রার্থনা হুনেদেছিল বারো মনস্কামনা পূরণ করে দেছিল।

সমগ্র গৌহাটীবাসী, মেঘালয়, সমগ্র ব্রহ্মপুত্র ভেলীর বিষ্ণুপ্রিয়া মণিপুরী, ইমাইন্দল-পুরীজেলেই, গাবুরাপুয়েই-হমবয়সী, বয়স্ক, বুড়া-বুড়ী, প্রভুর ভক্ত-মানাই, হাক্ষিয়ে হৃদি-তন-মন দিয়া, নিজরে পাছরীয়া, কর্মযজ্ঞহানাং ঝাপদিল। হার্দিক-কারিক-মানষিক, ধন-পয়সা, আদির পাংকালল এমনৌ নমদিলা, প্রভুর কৃপায় প্রভুর কর্মহান অতি সুষ্ঠুরূপে অনুষ্ঠিত ঐয়া গেলগা।

মাত্র দশ-বার দিনর ভিতরে, এসাদে কর্ম আহানর ভার ঙাকুরে পারানি এহান, দ্যৌর কৃপা, বারো দশ গিরিগীথানী আকতা ঐয়া উবা নাইলে, কুত্রাপি সম্ভব নাইব।

১২৯ তম শ্রীশ্রীরাধামাধবজীউ সেবাপূজা সমিতির বার্ষিক সাধারণ অধিবেশনহান আমার চৈ-চৈ নাং সমাজ এহানরাং দিগ্ দর্শন আহান অক।

আমার লেইরাপা সমাজ এহানর বহু সামূহিক উন্নতিমূলক কাম জল্পনা-কল্পনা ঐয়াই থাগেলগা। ইমাঠার, ইমালাম, বিঃ মঃ ইন্সপেক্টর, বিঃ মঃ রোডওয়েজ, বিঃ মঃ কমিনিউটি হল, বিঃ মঃ ১১৮সেবা, বিঃ মঃ সাহিত্য, বিঃ মঃ সোসিয়েল ওয়েলফেয়ার ট্রাস্ট, বিঃ মঃ এলঃ টীচার নিযুক্তি, বিঃ মঃ টিঃ কাউন্সিল, শৌ-সেবা সমিতি, এসাদে কতকিত। এহানর মূল কারণ-আমার একতার একান্ত অভাব। দ্যৌওরাং হাক্ষিয়ে কায়-মন-বাক্যে প্রার্থনা জানেইক আমারে ঐক্যর লুরী আকনাল্ল বাধে দ্যক।

স্বাধীন, স্বতন্ত্র, মন্ত্রপূতঃ বারি

শ্রীশ্রীরাধামাধবজীউ সেবাপূজা পরিচালন সমিতিহান ১৯৯৪ ইংরেজীং সোসাইটী রেজিস্ট্রেশন এ্যাক্টে ৯৭/১৯৯৪-৯৫ নং এ পঞ্জীয়নভুক্ত অছিল। ২০০৫ ইংরেজীং, ১২৫ তম বার্ষিক সাধারণ অধিবেশনে পয়লাকার সংবিধান সংশোধনী গৃহীত অছিল।


১৯৯৪-৯৫ ইংরেজীং গ্রহণ করেছিল সংবিধানহানর বিধি-বিধান, ধারা, হাক্ষিহানি এবাকাউ কার্যকরী নাছে। ২০০৪ ইংরেজীং হংকরেদেছিল সংবিধান সংশোধনী কমিটিহানে বছর আহান লাগেয়া সংবিধানর পয়লাকার সংশোধনীহানর খচরাহান দাখিল করেছিল। ২০০৫ ইংরেজীং ঐ পয়লাকার সংশোধনীহান ১২৫ তম বার্ষিক সাধারণ সভাং সর্বসম্মতিক্রমে গৃহীত অছিল। সংশোধিত সংবিধানে ৬নং ধারাত “স্বাধীন” শব্দগ, ২২নং ধারাত “স্বাধীনহান বা স্বতন্ত্রহান” শব্দগী যৌকরেছিল। ১৮নং ধারার “নিখিল বিষ্ণুপ্রিয়া মণিপুরী মহাসভা, সাহিত্য সভার সভাপতি বার সম্পাদক বার বিষ্ণুপ্রিয়া মণিপুরী সমাজর ধর্মপ্রাণ, অভিজ্ঞ গিরিগীথানী উতারেল উপদেষ্টা পরিষদ আহান গঠন অইতই” এ লাইন এহানি বিয়োজন করানি অছিল।

সমিতি এহানর কেন্দ্রীয় কমিটির ৮৫গ সদস্যরমা প্রায় ৭০ গ সদস্যই মহাসভার সদস্য মাতানি য়াকরের, ঐয়াউ, ১৯৯৪

ইংরেজীৎ কিয়াকা সমিতিহানে নিজর সংবিধান আহান গ্রহণ করেছি বারো কিয়াকা ২০০৫ ইংরেজীৎ পয়লাকার সংশোধনীহান গ্রহণ করেছি, ও সম্পর্কে এহানেই ব্যাখ্যা দিতারা যে, বর্তমান বিঃ মঃ সমাজহান নানান সভা সমিতিয়ে খেই খেই অনায় সমাজে একতা নেয়ছে। সমাজহান চৈ চৈনাং অছে। সামূহিক কুনো কাম আহান আতে লৈলে, অন্যান্য সভা সমিতিয়ে পাংলাকতে নাউ করতারা, বরঞ্চ বিরোধিতা করতারা। এহানে, সমাজে সামূহিক কুনো উন্নতিমূলক কাম আহান সহজে করানি নুয়ারতারা। এহানে বিষ্ণুপ্রিয়া মণিপুরী সমাজ প্রতিষ্ঠিত শ্রীশ্রী রাধামাধবজীউ মন্দিরর কাম-কাংজে ব্যাঘাত, বাধা-বিপৎতি দেহা দেছে। মন্দির এগ সমগ্র বিঃ মঃ সমাজর সম্পত্তিহান, সমাজর কুনো সভাসমিতির একক সম্পত্তি নাগৈ। বিঃ মঃ সমাজর হাবি জনসাধারণর এহানাং সমান অধিকার আছে। এ ভাব-মূর্তি পালকরিয়া, সমগ্র বিঃ মঃ সমাজরে উদবুদ্ধ করিয়া শ্রীশ্রীরাধামাধবজীউর সেবাপূজাৎ কুনো ব্যাঘাত, বাধা- বিপৎতি নায়া, অন্তর সেঙয়া যৌয় পারানির সুযোগ সুবিধা দেনার সালে এ সংবিধান এহান গ্রহণ করেছি। পয়লাকার সংবিধান সংশোধনীহান সমতিহানরে সাংবিধানিক ভাবে সার্বজনীন করানির সালে গ্রহণ করেছি। পৃথিবীর হাবি বিঃ মঃ মানুরে সাম্য-ঐক্যর লুরী আকনালল বাধিয়া ঐক্যবদ্ধ, শক্তিশালী, বৃহৎ বিঃ মঃ সমাজ আহান গঠন করিয়া শ্রীশ্রীরাধামাধবজীউর সেবাপূজাৎ ব্রতী করানি এহানেই সমিতির একমাত্র উদ্দেশ্যহান।

সংবিধান সংশোধনর ফলে, এবাকা সমাজর হাবি সংস্থা, সভা, সমিতির মানুয়ে, নিজর নিজর সভা, সমিতি, সংস্থাত থায়াউ, এ শ্রীশ্রীরাধামাধবজীউ সেবাপূজা সমতি এহানর সদস্যভুক্ত ঐয়া, শ্রীশ্রীরাধামাধবজীউর সেবাপূজাত, মনে কুনো দ্বিবিধা নাথৈয়া, সর্বান্তকরণে পাংলাক করে আহিতারা। প্রভুর সেবাৎ এবাকা কুনো প্রকারর ব্যাঘাত, বাধা-বিপৎতি নার। শ্রীধাম রাধাকুন্ডস্থিত শ্রীশ্রীরাধামাধবজীউ সেবাপূজা পরিচালন সমতির আগ সারির কণ্ধার গিরকগাছির পরিপক্ক জ্ঞান তথা বহু দূরদর্শিতার সার্থক ফলহান এহান। অতি বিচক্ষণ দৃষ্টিভংগীল, সভা, সমতির বেড় লালৈয়া, এ সর্বজন হিতায়, সর্বজন সুখায়, সংবিধান গ্রহণ বারো সংবিধান সংশোধন করেছিহান।

সমাজর এ দুঃসময়ে, সংবিধান সংশোধন এহান, চির যুগময়ী পদক্ষেপ আহান।



সম্পাদক, অপরূপা।

প্রকাশকর কথা আকচুটী

অপরূপা ৬ষ্ঠ বছর ৯ম সংখ্যা, নিকুলিল। প্রগতির লগে যুতি লাগেয়া মানু মানুর সাহিত্যর উত্তর উত্তর শ্রীবৃদ্ধি অর। মাতানিতে লাজর কথা, আমার বিষ্ণুপ্রিয়া মণিপুরী সাহিত্য, দিন যারগা মাছি খংচেৎ কারানিহান হিনপার। কারন অনুসন্ধান প্রকাশকর কর্ম সূচীৎ নাপরের।

মাহার পিঠিৎ মাহা, সম্পাদকর আকহানেই কথা হুনিয়া থাইলু, যুগতর লেখা এবাকাউ নাহেছে। এসাদে প্রায় বছর আহান কাটে যারগাহান দেহিয়া, সম্পাদক গিরকে মাতল -যেতা পেইলু এতালই, ৯ম সংখ্যাহান প্রকাশ কর। পাঠকর মন বুজে নুইলেউ সংকলনহানতে নিকুলক। কথাহান আচরিৎ অনারহান। সম্পাদক গিরকে সংকলনহান বন্ধ করানি নামনার। কিন্তু লিখক গুপ্তীর মনোভাব কি সংকলনহান বন্ধ অক এহান।

অপরূপা সমসাময়িক কালর সাহিত্য পত্রিকার সমপর্যায়ে থানার চেষ্টা করের, বহু ক্ষতি স্বীকার করিয়াউ। আর্থিক ক্ষতি উহানতে পূরণ করানি সম্পাদক বা প্রকাশক গাছিরতা সম্ভব। কিন্তু, সাহিত্য সৃষ্টির অভাব এহানতে তানুর আয়তুর সম্পূর্ণ বাইরে। এহানতে পুংকাতে নির্ভর করের সাহিত্যিকর গজে। ও ভারস্ভারহান যদি সাহিত্যিকে নালৈতারা, সাহিত্য পত্রিকা নিকালানি কঠিন ঐতৈ। সাহিত্যর পাঠক পাঠিকা নেইয়েলেউ, সাহিত্যিকর সাহিত্য সৃষ্টিতে বন্ধ ঐয়া ঐনা নেই।

লেইরাপা জাতহান, আকমুষ্টি মানু, উতার ৯০% শতাংশ, সাহিত্যতে বারাদে থৈক, বিষ্ণুপ্রিয়া মণিপুরীভাষার লেরিক লেইশৌ পাকরানি নামনেইতারা বুলিয়া মাতারা। ঊনবিংশ, বিংশ শতাব্দীতৌ মাতেছি কথাহান। একবিংশ শতাব্দীৎ, বিশ্বায়নর যুগেউ ঔকথা উহান হুনানি না থকছিলহান। হুনিয়ারতা নাগৈ, নথিপত্রে মাতেহরতা। এহানে কিহানর ঈদীত বহের ? জাত আহানর সভ্যতা, সংস্কৃতি, শিক্ষা-দিক্ষা, আর্থিক উন্নতাবস্থা, মানষিক বিকাশ, এতার মানদন্ড নির্ণয় করের ঔজাত উহানর সাহিত্যয়। যদি এহান সেত্য অর, উতা ঐলে, আমি কি পিঠিয়েদে পারা লেহানি অকরেছিতা ? ঔদিনতে নাহক !

জাতর গুরি ধরোতায়, এ সাহিত্যিক পরিমন্ডলর সংকুচনর কারণ অনুসন্ধান করিক, অনুধাবন করিক, প্রতিকারর আশু ব্যবস্থা করিক। উহান নাইলে, নিজরে সমাজর গুরি ধরোতা, সমাজপতি, সমাজ সেবক, সমাজ রক্ষক, সমাজ সংস্কারক, বা বিঃ মঃ সাহিত্যিক, ইত্যাদি অলঙ্কারল বিভূষিত করানিৎত বিরত থানায় শ্রেয় অইব না কিতা। ভবিতব্য তার ভবিষ্যৎ নিজেই নির্ধারণ করক। ভবিতব্য কুংগই প্রতিরোধ করে পারতৈগ ? ঘটমান, ঘটীয়মান, ঘটিতব্য, ঘটতৈ, তা আরো, ঘটানি দিক। অবশ্য, উসাদে অবস্থা নাদেহানিয়েই কল্যাণ। কল্যাণ অক !

-প্রকাশক, অপরূপা।

এ সংখ্যাত

এ সংখ্যাত আরতা

শতনাম



পুতক রামসেনারে বাপকে মাতল
মোরকা শতনাম আহান আনেদিছতা
কইনা ঔগই মাতেছিলিতা মোরকা সেন্ট
আগ আনেদিছ। ...লিক নাই, খানি নিয়াম
করে গছ।কিহান থাং? কিতা
অইলতা? কিয়া কাদরতা রাতি। ..প্রভুরে
ঙকরো আজি শতনামহান পাকরলুতাই
প্রভু আয়া ঘরগং উদয় অইল।প্রভুর গারিগর চন্দনর গং
নাপাউরিতা? -

- সাহিত্য সম্রাট ব্রজেন্দ্রকুমার সিংহ (পৃঃ -১১)

সুমনর প্রেম

মেংশেলহানাং শুক্লা নবমীর জোনাক আলপনা.....কিতা
কররতা। দুহাউরী। অসভ্যগ!রোহিতে মাতের-রস কাছে।
আলপনায় মাতলী-হরকাং মানুর হরকাং নজর।-- এহানৌ
ফাগিহান। গারিগং ফুতি নেই বুলতে।--উবাকাউ সিঙ্গারেইর
গালগিং খোয়ার পানি দি আক ফুটা লাগিয়া আছিল।--মন
এহান বস্তু আহান এলেতে তুরুঙে বড়োয়া সুরানি মারিয়া
থৈলুএছ। --এহানেই প্রেম। য়েপেই মনর সম্বন্ধ ছাড়া দেহর
সম্বন্ধ নেই। য়েপেই সূতিয়েই আনন্দ। প্রেম উপজিলে মানু
কঙালা ঐতারা হৃদিং স্নেহ মায়া মমতা করুণা বিরাজ করে।

-বিভূতি ভূষণ সিংহ (পৃঃ -৬)

মীয়াং/মৈয়াং/ময়াং



তুর্কী, তুঘলক, খিলজী, মোগল ইত্যাদি
ইসলাম পন্থী মানুষে মণিপুরীয়ে মিয়াং,
বাঙ্গাল নাঙে অভিহিত করেছি। west
Indian, North Indian যেতা মণিপুরে
আহেছি উতারে মণিপুরীয়ে বাঙ্গাল /
মীয়াং বলেছি। মসলমানরে মিঞা
বাঙ্গাল, হিন্দুরে বাঙ্গাল বলেছি। আমার
মানুয়ে নিজর নিজর ভিতরে পরিচয় দিতে "আমার বাঙ্গাল"
বুলিয়া পরিচয় দিতারা, উহান ভারতর উত্তর, পশ্চিম বারাদেস্ত
আহেছি উহান বুঝেইতারাতা।

- বলদেব সিংহ (পৃঃ -১৩)

সম্পাদকীয়

বিশ্বায়ন (কবিতা)

- মণীন্দ্র কুমার

১১ ডিসেম্বর রাতি (কবিতা)

- কাঞ্চনবরণ সিংহ

কিতা কৈলে ডাঙর (কবিতা)

- কবি বীরেন্দ্র কুমার সিংহ

রামায়ণ - আদিকান্ড (কবিতা)

- মহেন্দ্র কুমার সিংহ

প্রেম পূজারী (কবিতা, অনুবাদ)

- সন্ধ্যা সিংহ

জিন্দা দিল (এলা, অনুবাদ)

- সন্ধ্যা সিংহ

সমাজর ষায়িত্ব কারাং (প্রবন্ধ)

- বিমলেশ সিংহ

চিকিৎসা বিজ্ঞান (রচনা)

- ডঃ অশোক সিনহা

জিন্দেগী (কবিতা)

- মণীন্দ্র কুমার (মূলঃ মীনা সুব্বা)

মেজর নেপ্তা (রচনা)

- খঃ ফণী কুমার সিংহ

গোসাইর পুতক (অনুবাদ)

- সুনীল কুমার সিংহ

বেয়াপার সময় (রচনা) - কুমকুম সিংহ

কর্তব্য (রচনা) - ব্রজগোপাল সিংহ

প্রজাজলী - রাখারমণ ব্যানার্জী

কনাক শৌর আসর

প্রকাশকর কথা আকচুটি

চিঠি পত্রত মতামত

সমাজ দর্পণ

পৃঃ ১

পৃঃ ৪

পৃঃ ১৬

পৃঃ ২৪

পৃঃ ৫

পৃঃ ১৪

পৃঃ ১২

পৃঃ ১৫

পৃঃ ১৬

পৃঃ ১৭

পৃঃ ১৮

পৃঃ ২১

পৃঃ ২৪

পৃঃ ২৫

পৃঃ ২৭

পৃঃ ২৮

পৃঃ ২

পৃঃ ২৯

পৃঃ ৩০

মণীন্দ্র কুমার সিংহ

সম্পাদক

৪৭ রাজগড় রোড, গুয়াহাটী - ৭৮১০০৭ এস্ত শংকর সিংহ কতৃক প্রকাশিত, এজেলিকা ইন্সটিট, জি এম সি রোড, ভাসাগড়, গুয়াহাটী - দ্বারা মুদ্রিত
Tel: 0361-2524841 Mob. 94353-02702, www.aparupaezine.com, e-mail: aparupasahitya@gmail.com

বিশ্বায়ন

মণীন্দ্র কুমার

কুকুর কতগী, রম পড়েছি, আমার দেশী
পথর কাদার ডাস্টবিন্গৎ আমারাক দেছি
বিয়ার ভোজর চাকুম-চুকুম খানাৎ লাগেছি।
কালো পেপুড়া উদালা গারি, মানু কতগী
আগা কল্ঠা, লোয়ার শিক, আতে ধরেছি।
কাদাৎ আয়া কুকুরগীরে ডুপ ডাপ দেছি।
তুপিং নাপিং কুকুর উগী যৌ যৌ রকলা
আমার তাতো বাট বেলাছি, মানু কিহুন এলা।
মল মাল ধাবা বাজার, মানু চপ্প বুজেছি
ভি আই পি, সিকিউরিটি, আকতাউ না কমছি।
ডুম ডুম, বেরেক -বারাক, কালো ধূমা উঠিল
তিতর -বিতর গাড়ী মানু, পিছে বাঁশী রহিল।
কাপক -ধলা ফুতি পিদা, অথাইবানাই নেতা
লগে কতগী মানু আহেছি, থতা ধরেছিতা।
মরা মানুর কুটুমরে দিতাই তিন তিন লাখ
আত-জাং কাপাতারে আধা আধা লাখ,
সারেন্ডার করলে কিন্তু পেইতাই দ্বি দ্বি লাখ।
মরলে তিন লাখ, মরলে দ্বি লাখ, বাজেট করা আছে,
সরকার এগে নুয়ারিয়া যোগাড়তে থ দেছে।

৯০৯৫

রামায়ণ — আদিকান্ড

মহেন্দ্র কুমার সিংহ, দুধপাতিল।

(অপরূপা ৪র্থ সংখ্যার পিছে)

=নারায়ণে ভাগ চারিহানাং অবতার অনা=

গোলোক বৈকুণ্ঠপুরীয়ে হাবির গজে,
লক্ষ্মী বারো বিষ্ণু আছি হারৌপার মাঝে।
ওপেই আছে গাছ, হাবি গাছের গুরু,
মাগতারা ওতা পেইতারা, নাং কল্পতরু।
হামেশা বেলি জুনাক ঘগি নিকুলতারা,
গাছের তলে হকা ঘরগ, তাক লাগতারা।
রেশমী স্বর্গ সিঙ্গাসন গজে তুলিয়া,
আছে উপেই বনমালী বীরাসনে বয়া।
মনে মনে প্রভুর জাগিল খৌরাং আহান,
আগত বুরি অনা চারিগ এহান।
শ্রীরাম ভরত বারো শত্রু লক্ষ্মণ,
চারি রূপে অবতার এল নারায়ণ।
লক্ষ্মী মালপি সীতা ইমা বাঙ্গদে বহেছে,
লক্ষ্মণে আতল হনার ছাতিগ ধরেছে।
ভরত শত্রু বুলেইতারা চামর,
হনুর রামনাং লৈয়য়াও না লৈয়র।
এসাদে বৈকুণ্ঠত আছে গদাধর,
ওবাকা নারদ মুনি ওপেই যৌয়র।
বেনা যন্ত্র ধরিয়া হরিগুণ গার,
প্রভুর মুণ্ডে নারদো উবা এয়া থার।
রূপ দেহিয়া তাক লাগিয়া চার নারদে,
আহিরপানি বহের গালর গজেদে।
এরূপতে নারায়ণে কিয়া ধরলতা,
শঙ্কররাং গিয়া এহান আংকরতৌতা।
আগপিছ বারো মুণ্ডহান হারপাকুরাগ,
তারগজে হারপাকুরা আরতাতে কুঙ্গ।
এতা খালকরিয়া ঋষিয়ে যাত্রা করল,
পয়লা ব্রহ্মারাং গিয়া হমাহান দিল।
নিলগা ব্রহ্মারে লগে কৈলাশর চূড়াত,
সাজারাং এলগা হরগৌরীর খয়াত।
হমাদিয়া দ্বিয়োগি থাইলা উবা এয়া,
হারৌ এলা জবর ভক্তিরস কায়া।
দেহিয়া তানুরে অর হারৌ মহেশ্বরে,
কিসাদে আইলা আংকরের তানুরে।
মাতেদে বিধি তি, মাতহে দেবর্ষি,
কি কাম থায়া আজি কৈলাশে আছেছি।

বিরিকিয়ে মাতের, হনেদে ভোলানাথ,
দেখলু গোলোকে আজি অত্ৰকপা জগন্নাথ।
আগেতে দেখলাং আকখুলাগ নারায়ণ,
এবাকা চারিগ দেখলু কিহান কারণ।
এতা হনিয়া শিবে মাতের মুক্তি দিয়া,
যাইট লিশিং বছরান্তে ঐতৈ বুলিয়া।
রাবণ রাক্ষস থাইতৈ লঙ্কার দেশে,
মারাত যিতৈগা প্রভু রামর বেশে।
ঐতাই শৌ দশরথর ঘরে চারিগ,
রাম লক্ষ্মণ ভরত শত্রুগ্ন খুল্লাগ।
বাট আহানাত প্রভু চারি বাট অয়া,
তিন গর্ভন্ত ঐতাইগ খেলতাম চেয়া।
জানকীর লগে রামে লয়া লক্ষ্মণরে,
পিতৃসেত্যল যিতৈগা বনর ভিতরে।
আন্তুগা সীতারে রামে রাবণ বধিয়া,
লব-কুশ জরম ঐতাই সীতার গর্ভে আয়া।
যেবাকা মনুষ্য পাপ কামেইতাই,
রামনাং লৈলে তানু মুক্তি পেইতাই।

(ক্রমশঃ)

সুমনর প্রেম

বিভূতি ভূষণ সিংহ



আলপনা মদগল্য.....

টিং টিং টিং করে জলতরঙ্গে নুংশিপা তান বাজিয়া উঠিল।

মনর মেংশেলহানাং আহানর পিছে আহান ছবি ভাহিয়া উঠের.....

..গুলা নবমীর জোনাক, অষ্টাদশী রূপবতী আলপনা

চিতোর। রাণা কুস্তুর কেল্লা। স্কটিশ টুরিস্ট দল আহানর লগে আছে আলপনা। খিল্ খিল্ করে আহে আহে, চঞ্চুরার ফাল্ দিয়া কেল্লাগ বুলিয়া চেইরী। সিড়ি বেয়া রোহিত কেল্লাগর গজেদে কাযারগা। তিন তলা পেয়া কাইল। সিকিউরিটিয়ে তারে, আর গজেদে কানা নাদলা। চারিয় বারার খিড়কিয়েদে চিতোরর দৃশ্য চেয়া থাইল। লৌটাক লেঙৌলপুক। উচ উচ, লেঙৌর ঢউ। হাদি হাদিৎ হিলর নেম নেম টেঙাড়া। দূরেইং রংখা রংখা, গাছ বিরুখে বেড়িদিয়া থেছে দালানময় গাং আহান। ঔবেদেৎত আহিতারা মরুজাহাজ উঠ পারেং আহান। খুরাপে খুরাপে আহের গারে বাধা ঘণ্টির, ট্রেং, ট্রেং রহন। বেলীহান মুরর টিকগ লালছিল। রোহিত লামিয়া আহিল। চৌদ্দাগর কাদার সরাইখানা আগং হমেইল। ভক্ লাগেছিল। পরকার রাজস্থানী ভাত - রুটী চাংলুক আহান ভোজন কৈল। রৈদে - ছৌকরায় ঠুকরেছিল হান্তে বেরেঞ্চি আহানাং গারীগ দীঘলক বেলেয়া খানি গাছিল। সির্ সির্ বৌ আহানে মাঠিয়া দিতেই তার আহিগী জিপিল। ঔবেদে ঘুমজে পড়িলগা।

পানির ইং, মেইথঙে লাগানিয়ে ঘুম বাগিল। আলপনায় মাটির সুরাইগৎত আতর তারাহানাং পানি লৈয়া লৈয়া রোহিতর মেইথং নাল করে দিরা।

- "সুরজগড় পেয়া গেছিলাংগা হানতে খানি ডিল পড়লাংগা। খানিগা আগে আহিলু। আলপনায়, গারিগ কালকরলী। " আজি রাতি এপেইং থানাং পড়লাং। রাতিকার ভোজন-প্রবন্ধ সরাইখানাং মাতে দেছু।

রোহিত, ভিতরে ভিতরে ছৌয়ছিল। আহে আহে, দুহানি পারাক, আলপনার কান দ্বহানি, জবরক মলে দেছিল।

- "কিতা কররতা, দুহাউরী, " বুললে, আলপনার কান দ্বহানি এড়েদিয়া, নাকগ টিপে দেছিল। নাকগ রাঙা অছিল। মাতেছিল - "

নাক-কান রাঙা ঐলে, তোরে বানাপানি আহের। বুলিয়াই, আলপনারে কালকরিল হিরাম নাদিয়া, দ্বিগো গালে চুমা দুহান দেছিল। " ধ্যৎ তেরী " বুলিয়া, আলপনা বনাৎত উঠিং বুলতেই, রোহিতে আত দ্বিগোহানিলো তেইরে চেৎক ধরিয়া বুকগৎ নাপ করে থৈল। আলপনার রেশমী কঙালা কালা চুল সাইলিয়া, রোহিতর মেইথংহান গুড়ে দিল। দ্বি আতল মেইথঙর চুলকাতা ছেচেয়া কালা মেঘর হাদিৎ, শারদর গুলা নবমীর জোনাকহান, খৌরাং মিটেয়া চেয়া থাইল। মেইথঙে চুমা আহান আঁকেদিয়া মাতল - " তোর এতাপারা রূপ, মি আগে কুনোদিন নাদেছেছু। রাঙা ওঠগীং পানির ডক মিটেয়া মাতল - " তোর ওঠগীর ঠুমহানে মোর অন্তরগ ঠুমৈল। তোর মোর জিনা এসাদেই ঠুমক।

আলপনায় ঠকেয়া মাতলী - " মানু আইলা। " বুলতেই রোহিতে আতহানি হচরৎ করল। আলপনা, ঝটক উঠিয়া খিল্ খিল্ ক আহিয়া মাতলী - " অসভাগ ! তোর কাদাং বৈলেই তি আদিম মানুগ অলপড়রগা।

মেঙশেলহানাং বারো ছবি আহান ভাহিয়া উঠিল

পহলগামে, গড়াং চড়িয়া, রোহিত বারো আলপনা বরফর গজেদে যিতারাগা। কতহান আকতা গিয়া, গড়াগৎত লামিয়া বরফর গজেদে আটানি অকরেছি। খাংতা জাংহান পিছলখেয়া আলপনা বরফর গজে পড়ে পড়লীগা। পড়লী বুলতেই গড়াগড়ি দিয়া নামথাপিয়েদে সাল গেলীগা। তেইরে ধরানিরকা রোহিত, বরফর গজেদে

ছেচায়েয়া গেলগা। আলপনারে ধরেতে বেলা, কিন্তু আটকাতে নুইল। তাও, আলপনারে কলকরিয়া আলপনার লগে লগে গড়াগড়ি দিয়া, নামথাপিয়েদে পড়ে গেলগা। ঘিয়েগিয়ে গড়াগড়ি দিতে দিতে তলে মায়া ফাম আহানাং গিয়া আটকিলাগা। আলপনায়, রোহিতেরে বুকগত চেৎক ধরিয়া থেছে। রোহিতের আহিগী জিপেছে। রোহিত, আলপনার বুকগর গজে উমৈয়া পড়িয়া থাইল। উঠানির নাং নেই।

-“বুকগ বাগে যারগা। মলপাকগ নাগে। দুহাউরি, উঠ। আলপনায় আহিগীল ঠায়েইলী।

-“অঃ সাব, হেঃ মেম সাব। গড়াওয়ালাগয় ডাহে ডাহে খলপি খলক করে আহিয়া মাতের - “বহৎ মজা আয়া, না মেম সাব।” রোহিতে মুকসি আহান দিয়া মাতের - “রস কাছে।”

-“হুরকাং মানুর হুরকাং নজর। অসতগ।” আলপনায় আহিগী পাকেয়া গড়াওয়ালাগরে চেইলী।

মেডশেলহানাং আরাক ছবি আহান দেহা দিল

শান্ত বহের যমুনা। রোহিত বারো আলপনা, চির ঘাটে যমুনার পানিৎ লামতারাগা। কদমঝারির তলে, ফুতির দোকান দেছে বুড়া দুকানি উগয়, ডাহিয়া মাতল - “মাইজী। ওঃ মাইজী। আপলোগ নাহানেকো যা রহিয়ে ত নাহানেকো কাপড়া পহন লীজিয়ে। বাকী সামান, সেন্ডেল, চশমা, বেগ, কাপড়া, য়াহা রখ যাইয়ে। লোটতে লে যানা। রোহিতে হাফপেন্ট আহান পিদল। বাকী তার জুতা, ফুতি-ফালি, বেগ আগৎ বড়েয়া, দুকানি উগরাং গছাদিল। আলপনায় পিদেছিলী ফুতিফালি হাবিতালো গাটে গেলীগা। যমুনার পারগৎ উবা ঐয়া ফুতি পটেইরী।

-“পিঠি বুলন দে। কদম ঝারিয়েদে চেয়া থাক। ফুতি পটেইতে চেয়া আছৎতা, লাজ নাপার। কুত্রিম ধমক হান দিয়া, কেথক আহান করিয়া, বারো মাতলী - “দেরে হোনার গিরক। মোর ফুতিফালিহানি মোর বেগ উগৎ বড়েয়া, পারগৎ খানি থদেগা। ছোঁয়েলেতা।” বুলিয়া, ওঠে মুকসি থাল করিয়া জবংক যমুনার পানিৎ পড়লী। রোহিত, গাটর পারে, লেঙোর গজেদে খানি আটাউটি করিয়া তেইর খানি উজানে, যমুনার পানিৎ লামিল। যমুনাহানর বুকগ পেয়া খানি হাতুরল। কতখুরমৌ বুড় দিল। হাতুরেয়া বুড়দিয়া, খানি খেলিয়া, পারগৎ কাইল। আলপনার, পানিৎত কানার কুন নাঙ নেই। পানিহানাতেই থাইলী।

রোহিতে পারগৎত ডাকদিল - “আলপনা, ঐলগা বেনায়, কায়া আয়। আলপনা যেসাদে আছিলী, ইমে উসাদেই গারগবধি পানিহানাং বুরদিয়াই থাইলী। বোবায় ধরেছি পারা।

রোহিতে ডরপেইল সটান্ দিয়া, নারগৎ চিন্তা গসিয়া, মাতল - “জাংহানিৎ গড়িয়াল লামেলা পাউরী। আইতু?” রোহিত আহে পড়তৈগা পাউরি খাল করিয়া, আলপনা ফিঙেলী। ঝটক্ক আত দ্বহানি পানিহানাংত নিকালেয়া, হেইকরে হেইকরে, তুংতা মাংতা লৌদিলী - “না-না-না। তি নাহি। ইমে, ফুতির বেগ উগ আনিয়া থদে।

রোহিত বেগগ বিছাড়েয়া গেলগা। বেগগ থছিল ফামে, বেগগ নেই। না দেখল। খানি আচরিৎ ঐল। চিন্তাৎ পড়িল। চিন্তাকায় মাতল - “বেগগ, বেগগ নেই গতে। পিদেছৎ ফুতিহানল কায়া আয়।

আলপনার অসহায় নারগ ভাহিয়া আহিল - “ফুতি নেইগতে।”

অতি আচরিৎ রোহিতে আঙকরল - হা, কিতায়া? - বুড়দিতে খুলে পড়েছিলগা। হুংগয় ভাহিয়েয়া নেছেগা।- আলপনার, শেল্ নারগ।

- গোপীর পাপহাবি ককৈল। যমুনাং ধৈয়া নিলগা। ফুলগপারা দেহগল কায়া আয়।- রোহিতের আহিগীৎ দুষ্টামি, নারে কপট দুকখ।

- এহানৌ ফাগিহান। গারিৎ ফুতি নেই বুলতে।- আহির পানি পড়িল মাটিক আলপনার।

রোহিতে তিক্ জানার - তোর দেহগৎ এবাকাউ পাপ আছে। যমুনাং হিনেয়াউ তোরতা কানাহান নাইল। নিম্পাপ মানু, বুনির শৌর ডেকি সরল পবিত্র ঐতার। কোন ওয়াখাল নেইয়র।

আলপনায় ছোঁয়েয়া মাতিরী - তি শুকদেব নাগে। - বারো নলৈয়া হেইচা করিরী - দে রে, মোর হনার গিরক। এহান ফাগীর সময়হান নাগে। পিদিল ফুতি আহান, আনে দেগা।

আলপনার বিবশ অবস্থাহানে রোহিতে ফাগি করানি এরে দিল।-হায় দে, বার আকখুরম চেয়া আহিগা - বুলিয়া গাটর পারর কাদার খনাঙ ঝারির তলে গেলগা। গিয়া দেহের, গাছ ঔঝারিৎ বুড়া বাদর আগ বৈয়া আছে। আলপনার ফুতির বেগ উগ চেৎক ধরেছে। তার আহিগী যমুনার পানিহানাদে। ফুতির বেগ উগ বেলা দেনিরকা, বাদর উগরাং, রোহিতে কত কাকুতি মিনতি কৈল। কুনো কানা নাইল। রোহিত আলৈয়া গাটর পারে গিয়া আলপনারে মাতল - তোর ফুতির বেগগ বাদরগয় নেছেগা। বেগগ দরিয়া গাছ ঝারিৎ বৈয়া আছে। নাউ বেলাদের। তি গিয়া মাগ্গা। হয়তবা তোরে দিতেউ পারে।

আলপনা, নারগ নিকালেয়া কাদানি অকরলী। হকগয় ডিফা নারগল রোহিতেরে মিনতী জানেইলী - দে রে। বুড়া দুকানি উগরাংত পিদিল ফুতি আহান লৈয়া আনেদেগা। এক্বাকাই বৃন্দাবনর মানু হাবি মাদানকার হিনা আহান দেনাং যমুনাহানাং আহিতাই। মি কিহান ঐতৌ। দে রে, তুড়াক ফুতি আহান আনেদেগা।

ফাগি নাকরিয়া, রোহিতে এবাকা আলপনারে ভৎসনা করল - উবাকা দুকানিগয় মাংতেতে কামহানসা নাকরলে। এবাকা চি চি করুরীতা। হাবি সময় গোরা পল্টনর বেপক্কা ভাব উহানে কানা নার। হাদি হাদিৎ লাজৌ দেব। নিয়াম হাকাং কাইলে ঠেটু বাগতারা। আজি

হারপা।

- লালৈলু নাই। তোর সাদানে, মুঙ-পিঠি চেয়া আটানিহান, আগে না হিকাছং নাই। এবাকা পস্তোয়া কিতা করতে ! জনমহানতে লেম্পালে বৈয়া ফিরাংতে পড়েছং উগোয়।

রোহিতে দুকানিগরাংত শাড়ী, ব্লাউজ, পেটিকোট, ব্রা, খুংতেই আকেইহান লৈয়া আনে দিল। দুকানিগয় লগে চানা পেকেট আহানৌ দিল। রোহিতে ফুতিহানি পানির কাদাং পারগৎ থদিয়া চানার পেকেট উগল গাছঝারির তলে আয়া উবা ঐল। যমুনার গাটর পারর মনোরম দৃশ্য, উপভোগ্য ঐলেউ চানার দুঃসাহস নাকরল।

গাছঝারির বাদর উগোয় কিন্তু রোহিতরে নাউ চার। আতে ধরেছে চানার পেকেট উগং আহিগী দিয়া কূপকরে চেয়া থাইল। রোহিতে চানার পেকেট উগ বাদর উগরাং না উড়া দিয়া, আলপনা ফুতি পটেয়া নাহেছে পেয়া, বাছেয়া থাইল। বাদর উগ জারে নুয়ারল পাউরী। গাছ ঝারির ডেল আগ ধরিয়া থক্ থক্ বাকারেইয়া শব্দ নিকালল। উপেয়ৌ রোহিতে চানা পেকেট উগ না উড়া দিলহান দেহিয়া, এ খুরুমতে বাদর উগোয় দাতগী নিকালেয়া কির্ কির্, চির্ চির্ শব্দ করে করে, আহিগী কট্ মট্ করে, রোহিতরে খেইব মাটিক চেয়া থাইল।

আলপনা ফুতি পিদিয়া গাছ ঝারির তলে আয়া উবা ঐলী। রোহিতে চানার পেকেট উগ আলপনার আতে দিয়া দিল। বাদর উগোয় এবাকা, রোহিতরে এড়ে দিয়া, আলপনারে বারো আলপনার আতর চানার পেকেট উগ, কূপকরে চেয়া থাইল।

আলপনায় চানার পেকেট উগ, বাদরগরে দিশা করিয়া উড়া দিল। উড়া দেনাতে ফাং নেই, বাদর উগোয় চানার পেকেট উগ দিশা করিয়া শূণ্যহানং ফাল আহান দিল। মিকুপ হানাত চানার পেকেট উগ, শূণ্যহানাং লুফিয়া লৈয়া বাদর উগো গাছঝারির আরাক ডেল আগং গিয়া বহিলগা। আলপনার ফুতির বেগগ ডপক লেঙৌর গজে পড়িল। রোহিতে মাটিহানাংত বেগগ তুলিয়া আনিয়া আলপনার আতে সমঝা দিল। আলপনায়, তেইর মুরগ রোহিতর লেম্পালে ঙাকরলী।

মেঙশেলহানাং ফুটিয়া উঠিল বৃন্দাবন গার্ডেনস্। নিকুলিয়া আহিলী মাইশুর সিল্কে হাজিয়া নীলবসনা সুন্দরী, আলপনা। পাগালা বৌহানে ফর্ ফর্ ফরদের শাড়িহানর আচল। বৌপেয়া চৌরিয়া অছে দূরন্ত চুল, মেইথঙে উবুরী ছুপন দেব। আত আহানল মেইথঙর চুল ছেচেইরী, আরাক আত আহানল শাড়ীহানর আচল খম করিরা। হিন পেইলী আলপনা। হাত আট বছরর জিরিনা, বয়স-চৌরিয়া, ডেং ডেং ফালদিরি। চঞ্চরার সদানে আয়া থেঙেলী মালকরাং। আত দ্বিযোহানিলো মালকরে ধরিয়া নমদে নমদে আচুলিরা। নিকুপায় আলপনা, পরীশৌগর আত আহান ধরিয়া স্ত্রীং

ডেইলেদে লামিয়া যিরিগা।

“পড়তেই, পড়তেই,” শব্দহানি অজান্তে নিকুলিল রোহিতর থতাৎত। রোহিত খানি ঙাকৈল। লাজ পেইল রোহিত। পিঠিয়েদেৎত দাপদিয়া আহিল দীঘল - ডাঙর শাং হবা মুনি আগ। ঞ্রীপিস্ ঞ্বেসুট পিদেছে। আহিগীং রে-বনর হোনার ফ্রেইমর কালা সান-গ্লাসে আরতাউ হবা, স্মার্ট লাগের। কৃষ্ণদাস, আলপনার হাজবেন্দ। আহিয়াই পরীশৌগরে আত আহানল ধরল। আরাক আত আহানল, আলপনারে কাকালিং বেড়িয়া ধরিয়া, স্ত্রীং ডেইলেদে লামে গেলগা।

রোহিতর মনহান ছেং করল। তার হুদিগ মুজুরিয়া উঠিল। তার, মনে মনে হাজাছিল ঘরগ ভৈচালহানে ধূলিস্যাং অইল। পৃথিবীহান তারাং নিমেষে অর্থহীন লাগিল। দেহানি নামনার ছবিহান কিয়াকা মেঙশেলে দেহাদিল। বর্কর আক্রোশে ধরেছিল কাপপ্লেটহানি মেঙশেলহান লাকুরিয়া উড়া দিল। মেঙশেলহান গুড়া গুড়া ঐয়া ঝর্ ঝরেয়া পাক্কাহানাং পড়িল। রোহিতর বিদ্রোহী মন, বিদ্রোহে অন্তরে গজ্জিয়া উঠিল। বাপক রাজ্যেশ্বরর গজে, জেরতাক মনিহারর গজে, খুরতাক দীনেশর গজে। মালক, চন্দ্রিকার গজে আক্রোশ নাগে, অভিমানে আহিগী ফাটিং ফাটিং ঐল। ঈশ্বরর বুদ্ধি বিচার বিবেচনার গজে তার সন্দে উপজিল। অবিশ্বাস, অভিমান, আক্রোশ হাবিতা তিলেয়া বহেছিল রুমগর বৌ-বানা বিষাক্ত ঐল। নিংশাহান লনা হিন পেইল। উঠিয়া গিয়া দুয়াং, লনহানাং বহিলগা। রোহিতর তিতা-কেহা মনহান, অতীতর বুকুগং উম করানি অকরল।

জয়পুর এস্ট্রনমিকেল কলেজে, রোহিত বারো আলপনা, আক্তা ঐয়া দিবছর এস্ট্রনমি পাকরেছিল। ঔ দিবছরে তানুর হুদি-তন-মন আগোরে আগোয় দিয়া হদাছিল। মনৌ বাধেছিল, তানু বিয়া করতাই। রোহিতে ঘরেদে, বাপক মালকরেউ বাগাছিল। রোহিতর বাপকে তার অমত জানাছিল - “আমার ঘরর তুল, তানুর ঘরর পুরাণা কৌলী আহান আছে। এ বিয়া এহান নাইতৈ। রোহিতর জেরতাকে মাতেছিল - “বর বাগরর প্রেম করেকুরাতা আহেছি। বংশর মান - মরিয়াদা নাথৈলা। দার ছেদদিয়া মাতেছিল - “কুনো কালেউ এ বিয়াহান নাইতৈ, নাইতৈ। খুরতাকে রোহিতরে তেমজেয়া মাতেছিল - “মনহান বুঝা। প্রেম ঐলেই যে বিয়া করানি লাগতৈ, এসাদে কুনো নিয়ম নেই। তারো, আলপনারে তি পাছর। মালকে বারাদে বৈয়া কাদেছিল। আক্ষেপ করেছিল - “মণিপুৱেংত আহেছিল যাত্রাপাটীয়ে, “থৈবী - খায়া” পালাহান পাঙন গেইলা ঔপেইংতে, বাপক, জেরতাক, খুরতাকে অকলৌকরে আহির পানি বেলা বেলা জলে নালে ঐয়া কাদেছিল। নিজর শৌগর বেলিতে, আহিৎ রকত নেইয়া। এ বিয়াহান নাইতৈ বলে পারলা।

রোহিত কাদেছিল। কণ্ডদিন কাদেছিল। পিছে, দরা-

পাকানা ঐল। কালা, বজ্রে পুড়া গাছ ঝারর সাদানে উবা ঐয়া থাইল। কুনো বাক-বিতন্ডা নাকরেছিল।

দ্বিবছর পিছেদে, আলপনার বাপকে, আলপনারে কৃষ্ণদাসর তুলো বিয়া দেছিল। ঔদিনো রোহিত অন্তরগ সকয়া কাদেছিল।

পিছেকার বছর, চন্ডীগড়র আর্মি অফিসার সনতর জিলক, সুমনর তুলো, রাজ্যেশ্বরে, রোহিতর বিয়া দেছিল। ঔদিন, রোহিত নাকাদেছিল। রুকচেলীগ অলয়া আছিল। মালক চন্দ্রিকায়, হারো - পিয়ম নেই রুকচেলী পুতকর কালা আঙারা মেইখঙহান দেহিয়া ঠৈ সকয়া কাদেছিল।

ঔ বিয়াত, আলপনা বারো কৃষ্ণদাসো আহেছিল। রোহিতরে মাতাছিল। সুমনরে দানে, কাঠী আকছুরী বারো আঙঠি আগ পিদা দেছিল। রোহিত তার আহিগীলো, যে মাটীহান চেয়া আছিল, আর না তুলেছিল।

গেলগা দশ বছর এহান রোহিতে আলপনার সূতি মনহানাং আহানি নাদেছে। আলপনায় লুমকরলেউ তা ফিরনদিয়া নাচাছে। কিন্তু আজিতে। কায়াহীন মনর তুলো, যুদ্ধত রোহিতর হৃদির রকত, থতাদে বলক বলক করে নিকুলিয়া গাটহান ঐয়া ধাবদের। ঔগাটেদে, আলপনায় তায় নৌ আগং চড়িয়া ভাহিয়া যিতারাগা। তানুর ভরিহানে নৌগ বুড়িং বুড়িং করের। ডরহানে রোহিতর আহিগী জিপেছিল, উবেদে রোহিত লনহানাং ঘুমজে পড়েছিলগা।

হজাগ ঐলে দেহের, সুমন তার হিয়রগং বৈয়া আছে। আঙুলীগিল চুলর হাদি ফেরে দিরা। ইংপানিল তার মেইখংহান নাল করে দিরা। বিয়ান ফুয়াছিল পাউরী। সুমনে, টাপটগোংত চাহা কাপ আহান ডালিয়া - "পী" বলিয়া রোহিতর আতে দিলী। উবাকাউ সিঙ্গারেইর গালগীং খোয়ার পানি ফুটা ফুটা লাগিয়া আছিল। সিঙ্গারেইর মেহেকে বেডরুমগ মেহেকাছিল। জুয়াপনেই হাজার প্রশ্ন সুমুদ্রর পারগং দুর্জয় অভিমানে মুর কুটে কুটে মরেছিল। রোহিতর মুরগ মাটিয়া দিয়া দিয়া সিঙ্গারেইর মেহেকল মাতেছিল - "রাতি লনহানাং ঘুমজিয়া আছিলে। গারীগ জ্বিগ অছিল। বিব্ বিব্ করে কিতা কাতা মাহি বকিয়া আছিলে। তুলিয়া আনিয়া ফামহানাং ঘুমজুয়া দেছিল। তাপহানতে এবাকা নেয়ছে। এবাকা কিমে আছং!"

"সুমন!" রোহিতে হাতেক ডাকদিল। চেঞ্চরার নার আগ, ঝিপে আহের টেকার ইকাইথিপীর পাতার হাদিয়েদে, হিনপেয়া নিকুলিয়া আহিল। তার ওঠগী থুর থুরি কাপেছিল।

সুমনে নঙিয়া আঙকরেছিল - "মাত, কিহান মাতানি মনার। পানির কলহগংত নিকুলিয়া আহেছিল সুমনর নারগ।

"কথাদে, তি না ছোঁয়েতেই। বরফেংত নিকুলেছে রোহিতর ইঙে বারাছে নারগ। ঝক্ ঝক্ করের আহিগীলো, সুমনর আহিগীত ভরশা বিছাড়ার।

- "অতদিনো নাউ ছোঁয়েছ। আজিয়ো নাউ ছোঁয়েতো। পিছেদেউ না ছোঁয়েতো। সুমনে আশাস দিল।

ওয়াইশাঙেয়া রোহিতে নিগ্গিক্তে দীঘলক নিংখাহান

কারল। পালংহানর রেলিঙে মল আগ দিয়া রোহিত পিঠিহানল ডাইল। নারগ শেঙ করিয়া মাতল-

- "দশ বছর পিছেদে, পউরু, আচার্য্য বিবেশ্বরয়া মিউজিয়মে আলপনা ব্যানাজ্জীর তুল মোর দেহা অছিল। ঠিক দেহা অছিলতা নাগে। অকনা অছিলাং।

মি তুপিং নাপিং অপড়েছিলুগা। আলপনারে আহি তুলিয়া চানা নুয়ারেছিল। তেই আতিংখা লাকুরিয়া উবা অছিল। আহিগীং বিজুরীর চমক। ওঠগীং মুকসি। মাতেছিল - "সুমন কিমে আছে। তেইরে মোর বানা নুগশি দিছ। মাতিয়া বিজয়িনীর বেশে গেছিলীগা। মি লাজে লজ্জায় মাটিং মেইখং কুপিয়া পড়িয়া আছিল। যেমন, রাজে ধরা পরা গোপেশ্বর। তেবো, আলপনার ছবিহান মনহানাংত উফারেয়া বেলা নুইল। কুডুনি এগোয় মোরে, অহরহ কুড়ে কুড়ে খা নেরগা।

সুমনে প্রেমভরে, রোহিতর মুরর চুল, তেইর আঙুলীগীলো ফেরে ফেরে মাতলী - "এসাদেই অর। এহানেই স্বাভাবিক। মন এহানাং আকখুরুম ছবি আহান কাইলে, উহান মুছিয়া বেলানি চিলর। মন এহানতে শিলেটহান নাগে নাই, মনেইলু আকে বেললু, নাইলহান দেখলে, মিটা বেললু। মন এহান বস্তু হানো নাগে যে, না মনেইলে উড়াদিয়া বেলা দে পারিয়ার। বা মনেইলে তুরুঙে বড়েয়া, তুমিলক থ পারিয়ার। মন এহানতে, মনহানর গজে ভরদিয়া আটের। মন এহানরে না সক পারর, না ধরে পারর। তোর মন, তোর অধিকারে থাইলেউ, তোর আজ্ঞাবহগতে নাগে। মন এহানরে, না তি নুঙেই করে পারর, না তি হিন দিয়া পারর। কিন্তু, মন এহানে মনেইলেতে, তোরে নুঙেইও করে পারের, তোরে হিনো দিয়া পারের। তারো, মনে কি ছবি ভাহের, মনহানে কিতা মনার, য্যাম খালকরানি না লাগের। মনর তুলো না খেঙে। উসাদে অবস্থাত, দৈহিক বা মানষিক কুনো কাম আহানাং জাবুর দিয়া থাইছ। পাহরে পারতেই।

রোহিতে পাঙেয়া সুমনরে চার। মনর এতাহাবি অলিগলি সুমনে কিসাদে হারপেইল, যেতা রোহিতে আজিপেয়া না হারপাছে। দুয়ারহানাদে দৃষ্টি দিয়া, রোহিতে মাতের -

- "সুমন! হয়তঃ তি হারপাছং, না হারপাখাইলেউ, আকদিনতে হারপেইতেই। তারো, মানুর থতাংত হারপানির আগেই মি তোরে মাতে বেলইং। আলপনারে মি বিয়া করানি মনাছিল।

সুমনে লকর পানির ইং নারগল মাতলী-মি হাবিতা হারপাছ।

হনিয়া রোহিতর ঠৈমামিং চৈয়েল। আন্দির গাঠি মেইখিঙ শ্বেতা পড়িল। হিনপেয়া সুমনরে আঙকরল-

- হাবিতা হারপাছং। কিসাদে?

সুমনে কিতিকুরুম নায়া মাতলী-

-আলপনা মোর ভরন মননকর জিলক। তেই জেঠিগ।
রোহিতর জাংর তলর মাটি ছেচিয়া গেলগা। কতহান
আকতা লাকনা করিয়া নিজরে সান্তালেয়া ছানি নাছানি
পারাক মাতে গেলগা

- তোর তুলো বিয়া অনির আগে, আলপনা, মোর হুদি-
তন-মন জুড়িয়া আছিল। তবে, আমারতা কুনো দৈহিক
সম্পর্ক নেয়ছিল। এবাকাউ গোপনে, কুনো কুনো দিন, রাতি
নাইলে দিনে, বিয়ানে নাইলে সেন্দাং, আলপনা মোর মনে
আহিরা। আলপনা আহিলে মি আনমনা অউরী। আশঙ্কায়
বিবশ অউরী। মানুরে, তোরে, ডর পাউরী। মন উচাটন অর।
কান হিঙারেয়া, উৎকণ্ঠাল বাছেয়া থাউরী, কুন্সাকা আলপনা
যিতেগা। তেই গেলগা, মি ওয়াইশাঙেরী। তেই থাইরী তুপ
উহান, মি মোর মেইথংহানাং, ভয়, ভাবনা, দুঃস্খিতা,
উৎকণ্ঠা আদির কুনো ছাপ পড়ানি নাদুরী। মেইথঙ হানাং
শান্তি লেপিয়া থৌরি। মানুরাং নাটলেং বুলিয়া। কিন্তু উহানে,
মোর ভিতর এগ, চিলা চিলা ঐয়া রকত জঙে জঙে, মি
এবাকা শক্তি হাবি হারেইলু। আজি দশ বছর এসাদে করে
নিজরে ঠকোয়া থাইলু। এবাকাতে ঠুইলু। আর নুইলু।

বারিষার বরণর শেষান্তর নিস্তেজ দলা বরণ চাকার
ডেকি শান্ত সুমন। মেইথঙে কুনো অভিব্যক্তি নেই। রোহিতর
কথা হুনিয়া ধীর স্থির নারগলো মাতলী -

- "এহানো অতি স্বাভাবিক। মুনি মানু, যেতাং
আত্মমর্যাদাবোধ থার, স্বাভিমান থার, সমাজর ডর ভয়
থার, যেতায় আত্মীয় পরিজনরে হেয় করানি না মনেইতারা,
নিজর মৌয়েই জিপুতরাং নিজরে হুরকাং করানি না
মনেইতারা, মৌয়েইরে সন্মান দিতারা, তানুরতা এসাদেই
অর। তানু নিজর হারো পিয়ম, নুঙেই নুংশি জলাঞ্জলি দিয়া
অন্যরে হারো করিয়া থনা মনেইতারা। এহানেই প্রেম।
যেপেই মনর সম্বন্ধ ছাড়া, দেহর সম্বন্ধ নেই। যেপেই
স্মৃতিয়েই আনন্দ, নিঃশিঙেই নুঙেই। যেপেয় কামনা বাসনার
মত্ততা নেই।

রোহিত, সুমনরে চেইয়াই আছে। বিয়ানকার রৈদর
মিঙালে তেইর মেইথঙহান ঙালছিল। কথা এতা মাতে
যিতেগা, তেইর মেইথঙে নানা রঙর বিজুরী খেলেছিল।
তেইর কথা, "বৃত্তিহীন প্রেম, স্বর্গাদপি গরীয়সী," রোহিতর
অন্তরে গাথেছিল।

রোহিতে ঙাকৈয়া তেইরে প্রশ্ন করেছিল, - "সুমন!
এবাকাউ মোর মনর নিভৃত কুঞ্জ, আলপনা, সংগোপনে
আহিরা বুললু, এহানাতৌ তোর মনে হীন না পাকৈলতা?"

সুমনে, হৃদয়হীন, সংশয় বিহীন, অতি সহজ, সরল
নারগল জুয়াপ দেছিল - "না। মোটেই না হিনপাছু। খানি
দম ধরিয়া, হুদা মাতেছিল - "প্রশ্নহান নিরর্থক। উহান
নাইলে আজি আট বছর এহান তোর সেবার সুযোগ
নাপেইলু ঐছ।"

সুমনর কথা যত হুনের, রোহিত তত আচরিং

অযারগা। সুমনর গজে তার শ্রদ্ধা ক্রমাৎ বাড়ে যারগা।
রোহিতে আকতা মাতল - "তোর ডর নাইল, সন্দে নাইল,
কুনোদিন অবিশ্বাস নাইল, তোরে এড়েদিয়া, মি আলপনারাং
যিতেগা পারে?"

শব্দ নাকরিয়া সুমন, ওঠগীল হেইরাপ আহিলী। ঔ
আহানিয়ে তেইর সারা মেইথঙে জাপচন্দন লেপেদিল।
চন্দনর গংহানে কোঠাউগো আমোদিত করিয়া মাতলী - "
আলপনার, তোর প্রেম, ধূপর গংহানর সাদানে পবিত্র,
শুদ্ধ, নির্মূল। উহানে তি, আলপনার প্রেম হুদিগং থৈয়া,
তেইর দেহাগরে বিসর্জন দিয়া পারেছংতা। তোর অন্তরে
প্রেম উব্জছে। তারো তি মোরেউ বানা পার, মোরেউ শ্রদ্ধা
করর। হুদিং প্রেম উব্জিলে মন কঙালা অর। মানু নম্র
ঐতারা। প্রেমভাব অন্তরে জাগলে মানুরে হিন দে
নুয়ারতারা। মি হারপাউরী, আলপনারে বিয়া করে নুয়ারিয়া
তি কতিহান হিন পার। তোর হিন এহান দেহিয়া মিয়ৌ হিন
পাউরী। হাচাহান মাতিং বুলে - তোরে ডর, ভয়, অবিশ্বাস,
মোরতা, আকতাউ নেই। তোর গজে বরঞ্চ, মোর মায়া
উব্জছে।

কথা এহানি মাতিয়া, সুমন, রোহিতর বুকগং মেইথঙ
হান কুপিয়া ঙায়া থাইলী। তেইর আহির পানি রোহিতর
বুকগং ফুটা ফুটা করে জঙিয়া পড়ের। আহির পানিলো
রোহিতর হিন দুক হাবি ধয়া পুছিয়া নেই করে দেনি
মনেইলী। রোহিতর বুকগং ঙায়া ঙায়া সুমনে বারো মাতলী

- "প্রেম এহান পাপহান নাইগে। না, অভিশাপও নাইগে।
প্রেম অপরাধও নাইগে। প্রেম, ধর্ম আহান। যুগ ধর্ম বুলে
পারর অথবা বয় ধর্ম। পৃথিবীর শ্রেষ্ঠ ধর্ম।"

বেবাক বিস্ময়ে বিস্মিত রোহিত, মুঞ্চ ঐয়া চেয়া আছে
সুমনরে। তার মনে ঐল, পৃথিবীর মাটি এরেদিয়া, তাপ্প
তাপ্প কায়া, মহাশূণ্যে উবা ঐয়া আছে সুমন। তেইর
মেইথঙে দিব্যজ্যোতি। তেইর অর্ধ স্ফুট থাম্পাল আহি
দগীত, স্নেহ, মায়া, মমতা, করুণা। বারো স্বর্গীয় প্রেম।

৪০৪

শতনাম

ব্রজেন্দ্রকুমার সিংহ



পুতক রামসেনা সালরহান দেহিয়া বাপকে মাতল -
কার্তিক মাহানরে দামোদর মাহান বুলতারা। এ মা এহানাং
নিরামিষ খেয়া দৌহমাদেনা থকর। মি পাপী এগতে মাহাহান
লয় যিতেগাউ হবাই প্রভুর নাঙহান ল নুয়ার লু।
পুতকে মাতল - কিহান মাতরতা মাতবেনাই চালাক করে।
বাসহান নাপেইলে
- হাই, নিক্কা মি প্রভুর হপন দেহরি থাংতে
- অঃ, য়ারি ডিগল নাকরিরে - মাতে বেলা।
- মোরকা শতনাম আহান আনেদিছতা।
- উহানতে কুরাং বিসারেয়া পেইতুগা - সময়ে নেইতাই।
- বিসারানি নালাগতই। ইন্টিশনর কাদাং চাহার হোটেল আগ
আছে। ঔগ বেলেয়া বাংগেদে গেছেগা পথ ঔগদে গেলেগা
পশারির দুকান আহান পেইতেই - ঔহানাং আংকরলে
পেইতেই।
কইনা উগয় সালইতে মাতেছিলিতা - মোরকা সেন্ট আগ
আনেদিছ - এপেইংত লনা লাজ পাউরি।
কিসাদে সেন্টগ আনতই ঔহান খালকরিয়া নিকুলের ঔপেই -
হাদিৎ কুরাংত বার শতনাম আহান আয়া গজহানাং
পড়িলতা। কইনা ঔগই কিজাৎতা পেইলে হারৌ অইতই
ঔহানাদে মনহান গইগ আছে ঔপেই বুড়া এগর আরাক দাবি
আহান। শতনামহানাং কতিতে অইতই থাং ! ঔহান বিসারানি
ঔহানহে চিলছেতা নাই। - না পাহরিছ ক।
রামসেনার মালকে মাতল - তোর শতনাম ঔহানতে এপেই
নাপেইতারা থাং। কাম আহানাং য়ারগা ঔগরে ----
বাপকে খামকরিয়া মাতল - যেহানাতে বেইরিগ নাই।
শতনামহান আনলে পূণ্য অইতই ঔউহানতে না খালকরলে।
এহানল না জেলেই এতারে ----
পুতক নিকুলিয়া গেলগা। বাপকে মাতল - মালকরতা পেয়া

পুতকৌ কানা পইসা আহানর মানুগ
নাছেতা।
বেলিটিকে মুরাকচুর ইরলপায় বার
ঘড়িয়ার হুকনে বাত খেয়া হদেয়া
হজক পিয়া পিয়া মাতের - আজিতে
নিরামিষ রাদলেই হবা অইলইছ।
রাতিতে কিংতাউ নেই - বেলিটিকে
নিরামিষ খানা থকছিলতা। ঔতারগজে
ঘরে শতনাম আহান আইতই দিনহান।
-কিয়াতে আগেতে না মাতলে ! বাত
খেয়া হদেয়া নিংসিং অইলেতা। -
তিয়ৌতে মাতানি থকছিল নাই। মাছগ
নায়া বাতগি খা নুয়ারুরিতা।
রামসেনার বাপক আড়িগ থয়া ফামে
হমেইলগা। তর্ক করিয়া কানা নেই।
এতাই ধর্মর মর্মহান কিতা
হারপেইতাইতা। ইমে খানাই

ঘুমজানিয়ে জানিতা না।
ঘুমেংত উঠিল ঔবাকা বেলিহান হমাছেগা। - রামসেনাতে
নাহেছে থাং !
- না।
- কিতায়াতে এমাটিক ডিলরতা। -বুলতে বুলতে রামসেনা
আহিল।
দ তোর শতনাম। এহান বিসারতেহে ডিলইলুতা নাই।
নাইলেতে মোর কামহানতে মিকুপ হানাং লয়ইল। নিজে
গেলুগা থাংতে
-পশরির দুকান ঔহানাং নাপেইলেথাং ?
- কুরাংকার পশরির দুকান। ঔপেই এবাকা বাতর দুকান
আগ দেছি।
কাদাং মটর স্ট্যান্ড আগ অইল থাংতে।
শতনাম ঔহান হমাদিয়া মলগর তলে থইল।
সেন্দাহান অইলতাই জাং আত ধয়া তুলসী পুং গৎ দৌ
হমাদেনাং বয়া -শতনাম ঔহান পাকরল। -প্রভুর নাম
এহান পাকরলে আপপানে ভক্তি আহান হমার মনহানাং।
কইতে আহোনে, হমা দেই।
শতনাম ঔহান আতহানাং ধরিয়া মাতল -এহানল না
কালি
হপনেদ-রামসেনার বাপকে হকগল বাকী ঔহান থুংকরে
নুয়ারল।
বাত পানি খেইতে বাক্কা রাতিহান অইল। জারহানৌ
পড়েছে
খানি আগে আগে।
কইনা ঔগই কলকিতা ধারেয়া খাটালগৎ হমেইলগা।
রামসেনায় আনেছে সেন্ট ঔগর গৎহান হুনল। হুনিয়া
গছিং বুলতে রামসেনাই মাতল -লিকনাই। কালিকার

দিনহানো থাইবতা খানি নিয়াম করে গছ। সেন্ট ঔহানি গছিয়া ঘুমজিগা বুলতে বুড়া ঔগই কাদানি অকরল-। এতাও খাং লাগিয়া ইমপানি অইলা -বুড়ি ঔগউ খাং লাগলি।

-কিহান খাং ? কিতা অইলতা ? কিয়া কাদরতা রাতি উতি ?

-প্রভু, প্রভু, মি অধম এগই হমাদৌরি প্রভু। প্রভু আহিলতা হারনাপাউরিখাং। প্রভুরে ঙককরো। আজি শতনামহান পাকরলুতাই প্রভু আয়া ঘরগৎ উদয় অইল। উঠো উঠো।

-প্রভু উদয় অইল বুলিয়া কিসাদে হারপেইলেতা ?

-হাঃ ! প্রভুর গারিগর জাপ চন্দনর নুংশিপা গংহান নাপাউরিতা ?

-এতা জাপ চন্দনর গং নাগই। ইমে কিতার আতরর গংহান।

-আমারাংতে রাতি উতি কিতার আতরর গং আইতইতা।

আজি শতনামহান পাকরলুতাই প্রভু আহিলতা দেখলে।

তুমিতে কুরাং ঠাচা করতরাইতা। প্রভু স্বয়াংগ আয়া

মুঙহানাং উবা অইলৌ নাকরতরাই মানু।

ঘুমজে হে রাতি উতি না জ্বালেই। জনম এহান ইমে এসাদে দেইমেই সেইমেই করিয়া জ্বালারগ, অইলগা ঘুমজে।

-প্রভু ঙক করেদিছ। এতাই তোর লীলাহান হারনাপেয়া---
হুনলেগ উঠ, হিনেয়া ধূপ থংমেই দিয়া প্রভুরে ঙককর। প্রভু আলথক অয়া না যাকগা। উঠোরিগ।

-পাগল অইলেতা ! জার এহানাং রাতি নঙেই হিনাগা বুলরতাতে। তিহে হিনেইবেগা।

-মিতে শতনামহান পাকরেছুগ। ধূপ থংমেই ঔতাতে তুমি জেলেয়েহে জুগৎ করতাই নাই। কইতে উঠলেতা। চালাক কর।

-মি নুয়ারতৌ। ভগবানর বাপক আইলেউ এবাকা নুয়ারতৌ। আর চিকারি নাদি। বিয়ানে উঠিয়া আলু রুয়েইতৌগ। ঘুমজানি দে।

-প্রভু ! প্রভু ! এহানতে কিহান এ। তি স্বয়াংগ আইতেউ তোরে না ঙককরতারাতা প্রভু।

-অইলগা আর প্রভু প্রভু নাকরি মালসায়া। তিয়ৌ ঘুমজে আমারেউ ঘুমজানি দে।

এগদে এতায় খাটালগৎ ইম্পানি অয়া -কথা হুনতারা। সামান্য

সেন্ট আগৎত -এহান হাবি অনাতে। রাতি এহান ঘরর বুজনগই কাদিয়া থাইলেতে তানুতে ঘুমজে পারলাতা।

কতহান থায়া রামসেনার বাপকে মাতল -তেইরে পূণ্যহান পা বুলতে নাকরল -হানতে প্রভু আলথক অয়া যিতগা। আঃ হা হা -এহানতে কিহান এ -চন্দ্রকলা। বহকগ ! তি অইলেউ প্রভুরে ঙককর বেনাই।

আয় মা ! প্রভুর সেবাং নাকরা নাকরি করানি গম নেই। উঠ মা ! তিয়ো ঘর এগর বহকগ না। হিনেয়া মাংকলে বর্তি আগ দে। বার ঘরগ হাবিগৎ ধূপ দে। উঠ মা। স্বয়াং প্রভু

আহেছে, তার গারিগর গৎ নাপাউরিখাং তিয়ো।

বহকগ থাংতে কিসাদে হৌরকগর কথাহানতে অমান্য করত।

আয়া থকক গারিগদে পানি ফুটি ডালিয়া ফুতি পটেয়া

সেঙয়া আইলি। মাংকলহানাং ফামশৌ আহান লেপিয়া -বর্তি

আগ দিল। ঘরগৎ ধূপর চাতি হানল হেইকরল।

রামসেনার বাপকে মাতল -জারহানৌ বাককা পড়েছে। মি

না উঠিৎ। তি ইমে বর্তি না নিভেছে পেয়া বাসা।

বর্তিগ নিভানিহান বাসেয়া-নিভিল আরো আংকরল -

এখুরুমতে ?

-এ খুরুমতে ঘুমজেগা। নিককা রাতি এহান করিছ। মাগো স্বয়াং প্রভু আইতে -হরে কৃষ্ণ।

চন্দ্রকলা খাটালগৎ হমেয়া মাতল -এহানতে কিহান এ।

নিককা জার এহানাং রাতি হিনানি। তোর সেন্ট এগয় এতা হাবি করেবতা। ঔগৎত প্রভুর গৎ আহেরতা। ঔগ নেয়ইলে কৃষ্ণউ নাহিতই।

ঔতা বুলিয়া পিঠীর দুয়ারেদে ঔগ খটাং হানাং বেলা দিল।

ঔতার পিছেদে শৌয়ইয়া ফামহানার কুন আগদে পড়িয়া থাইলিগা।

৪০৪

(কবিতা)

জিন্দা দিল

এলা-জগজিৎ সিং

(অনুবাদ - সন্ধ্যা সিংহ)

থমেই খালকরিয়া থৈস, মি না আহেছু পেয়া

মাতোয়ারা হৃদিগয় হৃদায়, দুনিয়া থর হাজেয়া

সংসার হাজেয়া থৈস, মি না আহেছু পেয়া।

লাংলা এহান, মরণর পরীক্ষাহান

আহির পানি লুকেয়া থৈস, মি না আহেছু পেয়া

তিলৈতাঙাই আমি, যেসাদে আছিলাং না খেয়য়া

ঠৈগ জিৎতা করিয়া থৈস, মি না আহেছু পেয়া।

৪০৫

মীয়াং, মৈয়াং, ময়াং ব্যুৎপত্তি

বলদেব সিংহ (ক্ষীতিশ)

মীয়াং, মৈয়াং, ময়াং শব্দৰ ব্যুৎপত্তিগত শব্দার্থ বিতৰ্ক মূলক। এ তিনিও শব্দ বিভিন্ন গ্রন্থে উল্লেখ পোৱাৰ। Linguistic Survey of India - G. A. Grierson, Account of Manipur Valley - Mc. Cullock, E. U. Dun - The Gazetteer of Manipur এ তিনিও গ্রন্থে যথাক্রমে ময়াং বা Mayang, মীয়াং বা Meeyang, মৈয়াং বা Maiyang শব্দ এগীৰ উল্লেখ আছে। মঞ্জুশ্ৰী চাকি সরকারৰ Feminism in a Traditional Society (Woman of the Manipur Valley) ময়াং বা Mayang শব্দৰ অর্থ বিদেশী Foreigner or North Indian বোলেছে। তেই ব্যাখ্যা কৰেছে Mayang meaning North Indian has become a rather derogatory term at present because of an anti - Indian mood in the last few years . দ্বাদশ শতাব্দীত ভাৰত বিদেশী বিভিন্ন বিদেশী জাতি তুৰ্কী, তুঘলক, খিলজী, মোগল এতায় সমগ্র মণিপুৰী জাতি এহানৰে বাঙাল বারো মীয়াং নাঙে অভিহিত কৰেছি। অষ্টাদশ শতাব্দীত মণিপুৰে মোগল বা মুসলমানৰ প্ৰব্ৰজন আছিল।

Captain E. W. Dun গিৰকে মাতেছে The Maiyangs are descendants of the Hindus who originally emigrated from the west . They formerly occupied the site of Maiyang Imphal which remained deserted for 30 years but has since been occupied by another class of immigrants from the west, the Mussalmans . The Maiyang, which simply implies a Western man, is frequently applied to the Mohammedan immigrants but it appears evident, in the first instance, applied to and has appropriate by the Hindu settlersThe chief of the Maiyangs called Kalaraja or Maiyang Ningthou (western chief) lives at the village of Ningthoukhong to the south of Bishenpur . অৰ্থাৎ পশ্চিমাগত হিন্দল মানুৰে, হিন্দু বারো মুসলমানৰে মৈয়াং নাঙে অভিহিত কৰেছি।

পশ্চিমাগত কালারাজা তথা কালিঞ্জৰ ৰাজাৰে মৈয়াং নিংথৌ, নিংথৌখঙে বসবাস কৰেছিল।

McCullock গিৰকে এসাদে ইকৰেছিল -And the Meeyangs or the people from the west, the grass cutters, are under who is styled Kalaraja . The Meeyangs are descendants of people from the western plains captured in arms against Munipore, and of some who immigrated of their own accords. At time they are said to have been very numerous and their

former chief place of residence Meeyang - yim - pham . অৰ্থাৎ পশ্চিমাগত মীয়াং এতা কালারাজাৰ অধীনে ঘাস কাপেকুৱাত। মীয়াং এতা মণিপুৰৰ বিৰুদ্ধে যুদ্ধে বন্দী আছিলাত। কতগী ইচ্ছামত দেশান্তৰী আছিলাত। এতাত এহানেই অবধাৰিত অৱ যে, মণিপুৰ ৰাজাৰ (পামহেইবা) বিৰুদ্ধে বিদ্রোহী ভৈয়ক শালাংবাই মোগল সৈন্যলো যুদ্ধ কৰতে বহু মোগল সৈন্য বন্দী আছিল, উতাৰে মৈতৈ-পাঙাল নাঙে অভিহিত কৰলা বারো ঘাস কাপাত নিয়োগ কৰেছিল। এতাই মীয়াং।

Grierson গিৰকে এসাদে মাছিল -A tribe known as Mayang speaks amongrel form of Assamese known by the same name....They are also known as Bishnupuria Manipuris or as Kalisa Manipuri and are said to be comparatively numerous among the Manipuri population of Cachar and Sylhet where their special dialect is still spoken in their homes as well as Methai and Bengali. অৰ্থাৎ ময়াং নাঙে জাত আহান আছি যেতায় অসমীয়াৰ অসমীয়া ঠাৱৰ ছাদে টটৰতাৰ। তানু বিশ্বপ্ৰিয়া মণিপুৰী বা কালিছা মণিপুৰী নাঙে পৰিচিত বারো কাছাড়, শিলেটে মণিপুৰীৰমা তানুৰ সংখ্যা যাম বারো তানু নিজৰ ঘৰে তানুৰ বিশেষ ঠাৱহানৰ লগে মৈতৈ বার বাংগালী টটৰতাৰ। মীয়াং / ময়াং / মৈয়াং নাঙ এতা মৈতৈ মানুৰে মাতে দেনায় বিদেশী লেখকে উল্লেখ কৰেছিল। বিশেষত মৈতৈই বিশ্বৰূপ সিংহ গিৰকে গ্ৰীয়াৰ্শন গিৰকৰে সহায় কৰেছিল। মৈতৈ ঠাৱহান প্ৰধানত polysyllabic, মেরাকে dis-syllabic, monosyllabic .

অউমতে মীয়াং, ময়াং, মৈয়াং শব্দগী বিশ্লেষণ কৰলে শব্দৰ ব্যুৎপত্তিগত অৰ্থাগম অৱ। সাধাৰণত য়, মি, মী, মো ইত্যাদি আদ্যক্ষৰল বিভিন্ন জাতে বা ঠাৱে মানু শব্দার্থ আছে। যেমন, মিজু, মোন, মুন্ডা ইত্যাদি। মৈতৈ ঠাৱে মী শব্দৰ অর্থ মানু বারো য়াং শব্দৰ বহু অর্থ আছে। (ক) য়াং শব্দৰ অর্থ শতক, যেমন য়াংখেই=অর্থ শতক। (খ) য়াং অর্থ তুৱা, যেমন হীয়াং = নৌ সিকনা। (গ) য়াং শব্দৰ অর্থ মূল, যেমন য়ুময়াং = ঘৰৰ মেরুদণ্ড। য়াং পাতল অৰ্থে। য়াম বহু অৰ্থে = মীয়াং = বহু মানু।

T.C.Hudson The Meithei .The same omphasis is obtained by using the words as yam which means many as mi- yam, a crowd of men . In Burmese the plural of noun is formed by add-

ing mya, which means many. বাৰ্মিজ ঠাৱে miyan শব্দৰ অৰ্থ মানু। মীয়ান +mya, মীয়ান + mou, মীয়ান +moi, অৰ্থাৎ মীয়ানমৌ, মীয়ানমৈ বোলতে গোষ্ঠী বা ফামৰ নাঙ অনুযায়ী মানুৰ পৰিচিতি। এ বিচাৰ ধাৰালো মাতে পাৰিয়ান যে, কামে কাজে তুৱা বা হেয় শিংপা শতাধিক মানু মণিপুৰৰ আদি মেৰুদণ্ড স্বৰূপ মূল আকপেইং বসবাস কৰিয়া অছিল। উতাৱে মীয়াং / মৈয়াং / ময়াং বোলে থাইবা। মৈতে ঠাৱে গল বা কল শব্দগল বিদেশী বুঝেইতাৱা, যেমন শাগল বুলতে বিদেশী ঘোড়াগ বুঝাৱ। উসাদে মৈতেই ঠাৱে পশ্চিম বাৱাৱে নঙচোপ বুলতাৱা। এ মী, মৈ, ম আদ্যক্ষৰ এগী কল, গল, চোপ এতাৱ লগে যোগ দিলেহে বিদেশী বা পশ্চিমাগত বুঝেইত নাই। মৈতেই ঠাৱে মেই অৰ্থ জ্বি। মেই যানা হায় = মৈয়ান/ মৈয়াং অগ্নি উপাসক দ্ৰাবিড়ৰ Mayan দৌৱ লগে বিষ্ণুৰ অভিন্নতা হেতু মৈয়ান/ ময়ান/ময়াং নাঙ অথাইব। The census report of Burma 1891এ উল্লেখ আছে ব্ৰহ্মদেশৰ মানুয়ে নিজৰে মীয়ান, ময়ান, ম্যুয়াং, মোন, মান বুলতাৱা, যেহানৰ অৰ্থ মানু। মীয়ানমৌ, মীয়ানমৈ শব্দৰ অৰ্থ মৈ বা মৌ অঞ্চলৰ মানু। ঔ মোঙ্গলীয় গোষ্ঠীৰ বাৰ্মিজ মানুয়ে মণিপুৰৰ মানুৱে ময়ান, মৈয়াং, মীয়াং বোলে থাইবা। মৈতেই মানুয়ে অউ অনুসাৱে বিষ্ণুপ্ৰিয়া মানুৱে মীয়াং/ মৈয়াং/ ময়াং বুলে থাইবা।

R. M. Nath গিৱকে তাৱ The Back Ground of Assamese Culture গ্ৰন্থে Munglai বাৱো Mungkula শব্দাদি উল্লেখ কৰেছে বাৱো Khalasis were the first cultured race in possession of Manipur valley বোলেছে।

N. N. Acharya গিৱকৰ The History of Mediaeval Assam নাঙৰ গ্ৰন্থে Mungkula শব্দ উল্লেখ কৰেছে। আহোম তাই ঠাৱে, কা, শব্দৰ অৰ্থ, আগমন যেমন, ম্যুংকা বা ম্যুংখা। বাৱো, মণিপুৰী ঠাৱে, লৌ, লাই, শব্দৰ অৰ্থ ভূমি, যেমন লৌপুক, লৌতল। অউমতে, ম্যুংলো, ম্যুংলাই। তদ্ৰূপ, ম্যুং-কা-লা / ম্যুং-কু- লা/ ম্যুংখালা। N. N. Acharya গিৱকৰ মতে Kula শব্দৰ অৰ্থ হিন্দু। সময় আহানাং সমগ্ৰ ভাৱতবৰ্ষৰে কোঁলদেশ বোলেছিল। তাৱ মতে, চা বাৱো শা শব্দৰ অৰ্থ সন্তান, যেমন ডিমাছা / ডিমাশা। অউমতে, মুঙ-কা-লা-ছা / মুঙ-কু-লা-ছা / মীয়াং কা-লা-ছা এসাদে নামান্তৰ আছে বুলে পাৰিয়ান।

মীয়াং বা মুসলমানৰে মীয়াং বাৱো বাঙ্গাল বোলিয়াৱ। মুসলমানউ নিজৰে মিঞা বুলতাৱা। এ মিঞা শব্দ বিকৃত অয়া মীয়াং, মিয়াং আছেতা। অউ কাৰণে অসমীয়া, বাঙ্গালী, মণিপুৰীয়ে মুসলমানৰে মিঞা বোলতাৱা। এ মিয়াং বা মিঞা শব্দগী অষ্টাদশ শতাব্দীৰ আগে ব্যৱহাৰ নাহে। মোগলসৈন্য মণিপুৰে আছিল। উতায় মৈতে জেলেই লয়া থয়া বসবাস কৰেছিল। বাৱো হাৱৌ অয়া পামহেইবাৱে "গৰীব নোয়াজ" বোলিয়া অভিহিত কৰেছিল। ঔ মুসলমান

উতাৱে, মৈতে বাঙ্গাল / মৈতে বাঙাল / মৈতে পাঙাল বোললা। আমাৰ মানুয়ে, বিশেষ কৰে প্ৰতাপগড় অঞ্চলৰ মানুয়ে নিজৰে আমাৰ বাঙাল বুলিয়া পৰিচয় দিতাৱা। উহান নিজৰে তল কৰানিহান আছে।

শ্ৰীযুত মঙ্গলবাবু সিংহৰ "বিষ্ণুপ্ৰিয়া মণিপুৰী ভাষাতত্ত্বৰ সমীক্ষা" গ্ৰন্থৰ ২য় খণ্ডে উল্লেখ কৰেছে যে, সংস্কৃতে গন্ধৰ্ব শব্দৰ অৰ্থ ময়ু। ময়ু শব্দন্ত ময়ুং / ময়াং / মীয়াং শব্দৰ নামান্তৰ আছে। কিন্তু, মিয়াং শব্দৰ ব্যৱহাৰ অষ্টাদশ শতাব্দীৰ আগে কোন গ্ৰন্থে উল্লেখ নেই। মীয়াং, বাঙাল, পাঙাল, কালিছা, আকোকসা, খাই ইত্যাদি শব্দ অষ্টাদশ শতকেত্ত ব্যৱহাৰ আছে। তাৱ আগে নেই। বিষ্ণুপ্ৰিয়া মণিপুৰী ঠাৱে, মন্ডপ বা মালঠেপৰ হমবুকুগৎ কুপতাৱা খুটাগৰে মেয়ুল বা মেয়ুম বোলতাৱা যেহানৰ অৰ্থ (য়ুম=ঘৰ) ঘৰৰ মূলগ।

উপসংহাৱে মাতে পাৰিয়ান -মীয়াং / মৈয়াং / ময়াং শব্দৰ অৰ্থ দুহান। (১) মুসলমানৰ মিঞাত মীয়াং (২) হিন্দুৰ মীয়াম / মেয়ুম / ময়াম / ময়াং যেতা আৰ্য্যভাষী শত শত মানু আকপেইং প্ৰধান বাসস্থান হিসাবে বসবাস কৰেছিল। উতাই ময়ুম / ময়াং নাঙে খ্যাত।

৪০৪

প্ৰেম পূজাৰী

অনুবাদ - সন্ধ্যা সিংহ

কথাহানি কেগালেতে লাম লামলাকে ফৌয়েতৈ
রটে পড়লেগাতে আফকৰ হোয়াদহানি নেয়েতৈ।
এহানৌ মানুয়ে আংকৰতাই তি হীন পাউৰীতা ?
হাৱপানিতে মনেইতাই কুংগয় হীন দিলতা ?
আঙুলীতে উঠতৈ, তোৱেল নুঙেই অছি উগীরাং।
আক্ফিৰতে আহিগী, যেসাদেউ দিতাই তোৱাং।
কথায় কথায় মোৱ মাৱামেউ কথাতে উঠতৈ,
লাজতে তি অউ পেইতেই, মৱমেউ তি মৱতেই।
উহানল কথা না কেগালেই, আছৰ না লাগক।
তোৱ মেইথঙে আহিৰ পানিৰ ছাকা না পড়ক।
ঐলতা অযাক্গা, সওয়াল জবাব নাউ কৰি,
মোৱ কথাউ আৱ কুনোদিন চেংকৰে নাউ ধৰি।

৪০৫

সমাজের দায়িত্ব কারাং

বিমলেশ সিংহ



পরিনিন্দা-পরচর্চা, নিনতা-নিনতি, ঠিসলা-ঠিসলি, মাকারা-মাকরি এতা বিধির সৃষ্ট মনুষ্য জাতির সহজাত ধর্মহান। এতা নেয়ইলে, মনুষ্য জাত এহানে পেটেদে ভাতগি ভরা নুয়ারতারা। বারো, অবসর সময় এহান কাটা নুয়ারতারা। আগোয় আগোরে

লাকাটির লৌখং বরেয়া না টটরলে পেটে ভাত না হমার।

আমার গিরিগিথানিরাং এবাকা অনথকপা নুয়া আহান লাগেছে, যেহানর না ডাক্তর, না হজক পাত আছে। ঔ নুয়ারাহান ঐলতায়, হাচুরা নুয়ারা। এ হাচুরা নুয়ারায়, আমার আগেকার নিয়ম-নীতি, ধর্ম, চালচলন হাতে হাতে কেলনি অকরেছে। উতারকা আমার উঠে আহিতারা শৌ শৌমারারে দোষ নাদিয়া তানুর মালক বাপকরে দায়ী করানি থক। কিয়া বুঝেতে, শৌয়ে, মালক বাপক, বুজন গিরিগিথানিরাংত হিকতারা। মানুর সমাজর নিয়ম নিতি, পিঙ্কন উড়ন আমারাং হাচুরেছে। এবাকা আমি, আমার সামাজিক নিয়ম নিতি, পিঙ্কন উড়ন এরদিয়া মানুরতা লৈলাং। আমার নিঙলপীর চূলে নিংথি কাপানি, ইয়াত বেরুনি বেরানি, গারগত বা ইয়াহান গুরিয়া ফিতুপশৌ আহান উড়ানি, এতা এবাকা অন্য জাতে নিলাগা। তানু ঔসাদে সাজেল করিয়া সিনেমাত, টিভিত নাচতারা, অভিনয় করতারা বারো লাখ লাখ রুপা কামেইতারা। আমার মানু, শৌয়ে বুজনে, উতা হবাপেয়া মনদিয়া চেয়ার। আমার স্বত্তল মানুয়ে বেপার করতারা, আমি ঔ বেপারর customer ছাড়া আর কিত্তাউ নাগয়।

এলা নাচার কথা খালকরলে পুন্নিঙ য়াম স্কর। আমার রাজর পল্লেই, পচোয়াল, খোওয়াল, লেইতেরেং উতালো অন্য জাতর মানুয়ে এলা নাচা দেহুয়েয়া সাক্বাস, বাহবা পেইতারা বারো বারন বুজিয়া ধন পয়সা কামেইতারা। আমারতায় অন্য জাতর সাজপোষাক দেখলেই, পরিবেশর তুল মিলিয়া চলানি বুলিয়া, ঔ পোষাক পরিচ্ছদ মনেয়া পিদতারা। খালকরলে খালকরে পারিয়ার, আমারতালো মানু মানুয়ে বরা বালা ঐতে থাইলা, আমি বারো মানুরতা নকল করিয়ার বুলতে এগদোনায় হৌগদেউ নায় নৌদুগর হাদিরমা পড়িয়া থাইলাং। কোনোগদেউ পাঙ নাইলাং। মানুয়ে মানুয়ে মণিপুরী নৃত্য famous বুলিয়া, মণিপুরী নৃত্য দেহুয়েয়া ধন পয়সা লুটতারা। আমি উতার নিরব দর্শক। উহানাত কথা আকচুটী থাইতে পারে, আমারতায় টি ভি ত সুযোগ পেইলেহে দেহুয়েইতা নাই। ঔ টিভিত সুযোগ পানা নাপানি উহানতে, গাছ ঝারেস্ত ফলগ কুম্বাকা পরতে বুলিয়া বাছেয়া থানা ছাড়া

আর কিত্তাউ নাগয়।

এবাকার যুগহান ফাংনার যুগ (কম্পিটিটিভ)। প্রতিযোগিতারকা কনাক- ডাঙর হাক্বিয়ে খালকরিল সময়হান। নিজে নিজর যোগ্যতা বারো উপযুক্ততা গড়ানি লাগতই। মানু মানুয়ে দিতায় বা পাংকরতায় বা সরকারে ব্যবস্থা করে দিতৈ, ঔদুরাশা উহান নাকরনিয়ে বালা। নিজর অস্তিত্ব, নিজর লাভ লোকসান নিজরাং থাইল। মানুরাং নাগয়।

আমার ইমা ঠারহান হবাকরে টটরানি জানিক নাজানিক, দোয়াদে বারো ঘর ভিতরে, যেপেইয়ো থাইক, টটরানি থক মাতৃ ভাষার মর্যাদার সালে। পরিসংখ্যাত দেহিয়ারতায়, টাউন, শহর বা নগরে থাইতারাতাই মানুর পেট আচুলিয়ার বুলিয়া, মানুর ঠার style করিয়া টটরানিত মত্ত অছি। এহানে শৌ জিপুতরেউ, মানুর ঠারে টটরানিত motivate করে বেলাছি। এহান আমার জাতরকা দুর্ভাগ্যজনক বুলিয়া নিংকরুরি। কিয়া বুঝেতে, মানু মানুর ঠাররে বরা করতেগা আমার ইমা ঠাররে লেইরা করিয়া নিয়ারগা, যেহান সমাজরকা ক্ষতিকারক। মাইকেল মধুসূদন দত্ত, ইংরেজী য়াম জানুগ বুলিয়া খুঁটান ধর্ম লছিল, খুঁটান জেলাগ বিয়া করেছিল, ইংরেজী ভাষাত ইকরেছিল। কিন্তু লয়ইতেগা, লেইরাহানে চলে নুইয়ারলে পন্ডিত ঈশ্বর চন্দ্র বিদ্যাসাগরে তারে সাহায্য করিয়া জিংতা করেছিল। উহানে বিদ্যাসাগররে নিংকরিয়া ইকরেছিল-

বিদ্যার সাগর তুমি বিখ্যাত ভারতে
করুণার সিদ্ধ তুমি সেই জানে মনে।

নিজর জাতর স্বাভাবিক কামকাজ করে পারলেই সিদ্ধিলাভ অর।

এবাকার পৃথিবীর সভ্যতারমা দেহিয়ারতা, ডাঙর চাংখল লয়া, ডাঙর চাংখল জাতর মানুয়ে, হুরকাং লয়া, হুরকাং জাতর জাত-পাত, লাম-লামচৌ, ঠার-বার, ডাঙর মাছগয় হুরমাছগরে গিলানির সাদানে গিলিয়া নেনাত থেঙছি। উহানে আমার বিষ্ণুপ্রিয়া মণিপুরী সমাজ এহানর যত ধনপয়সাওয়ালা, শিক্ষিত, উচ থাকে আছি, হাক্বিয়ে আমার জাত এহানরকা, খানি মানি ত্যাগ স্বীকার করিয়া অইলেউ, জাত এহানর মানুরে হাক্বি বারাদে পাংলাক করানি, আজিকার দিনে অতি দরকারী অছে।

সমাজর লেইরাপা সাধারণ গিরিগিথানিরে বুঝেইতে মাতেইতে নুঙেই, কিন্তু পাংকালপা মেয়েকগ দেহেছি গিরিগিথানিরে মাতেইতে বুঝেইতে গেলেগা জিল্লার ধলা ঘরগ দেহানি লাগের।

আজিকার বিশ্ব সভ্যতাত, বেয়াপার অবদান য়াম বারো সমাজর আমূল পরবর্তনরকা বেয়াপার ভূমিকাহান মুনিরাংত য়াম। হানতে, আমার বেয়াপারাং আমার হেইচা থাইল যে, নারীজাতির মৌলিক অধিকার অটুট থয়া জাতর

উন্নতির সালে বেয়াপারে আগভাগ নাদলে জাতর আশা
আকাংখা পূরণ ঐতে বুলিয়া নিং নার। সমাজর যেকোনো
কর্ম বা উৎসব বেয়াপার আতহানি নালাগলে যেসাদে
সিজিলে নাচলের ঠিক ঔসাদে নারীসমাজ না যৌয়েলে
সমাজর লেইতেরেঙর সিজিল হানৌ নাইতই। ইমা ঠারর
মর্যাদা রক্ষা করানি হানৌ বেয়াপারাং হৌত নুন য়াম দেনা
বা য়াত দেনাহান পারা। ইমায় ঘরে ইমাঠার টটরলে
শৌজিপুতে foreign ঠার না টটরতাই।

আমি যেসাদে খাংতাককরে “হেইমার” বুলিয়া মাতিয়ার
উহান ইংলিশে মাত্তারাতায় “my god” বারো বাংলালো
মাত্তারাতায় “মাইগো মাই”। উহানল ইমাঠার পালনির মূলে
ইমাইন্দলরাং বর্তায়হান য়াম অয়া পড়ের। মাতৃ ভাষার
প্রতি মায়াজাল সৃষ্টি করানির দায়িত্ব বেয়াপারাং অনেক গুনে
য়াম থানায় সমাজ চেতনার দাতীত্বহানৌ বেয়াপারাং
কাংকরে পারলে চিতল বুয়ালে ছরকাং মাছ গিলে নুয়ারতায়
বুলিয়া নিংকরুরি।

৪০৪

১১ ডিসেম্বর রাত

কাঞ্চনবরণ সিংহ

কবিতায় কবিগর মরণহান প্রার্থনা জানেইল
কবিগই কাব্যঠার হাজানির প্রয়োজন নেই আর
কবিতার গারিত

কবিতা এবাকা আরাক আগর সম্পতিহান
ঔপেই কবিগর হমানির পথগত বেড় দেসি

কবিগয় কুন প্রেমপ্রার্থী কবি আগরে তুচ্ছগ নিংকরে পারিরি
তার দলা অনুভূতি উতারেউ

কবিগউ কমগ নাগই
তা প্রেমর নিষ্ঠুরতারে কুনদিন ডর নাপাসে
হুদা তারে তালকরেসিল লাইলাই আত্মসম্মানহীনতা আহানে

আজি কবির মৃত্যুদিবস
কবিতারতাও
কবিতার কবিতারতাও

আজি কবির নির্জন মরণবরণ
শাশানর মাটিত কবি
কবিতার হাবি মেয়েক
জিগর জুহানে লেখতই কবিগরে
কবিতার মেয়েকগিরে

৪০৫

চিকিৎসা বিভ্রাট

ডঃ অশোক সিনহা

অ্যালোপেথিক ডাক্তরি করানি এহান হাবিৎত
ইজ্জুহান। চন্দ্রই তার মতহান মাতল। আতর আঙুলিৎ
লেহানি যাকরের হাবি হজকর নমুনা। খালকর, তাপ টাপ
উঠিলতানা যেতাউ আকতা “মাইসিন” নাইলে “ডি এস”
হজক লগে ক্রসিন। লগে লগে তাপহান তি থাক মি যাংগা
বুলতই। নিংসা আচুলানি অইলে “বেটনেসল” খয়াদে।
আরুত কাকালিৎ দুহানিহান অইলে “জেসিক” গ্রুপর যে
কোন হজক, পেট হবা নাইলে “জল” গ্রুপর হজক। ইমে
এতা নাই তানুর ডাক্তরি। এহানিরকা ছয় বছর হাবি কিয়া
পাকরানি লাগের হারপানি মক্ষিল। আকতায় বার আরাক দি
আক বছর পাকরিয়া স্পেশালিষ্ট অয়া আইতার। এতা হাবি
ভিজিট নিয়াম লনার বুদ্ধি না। তানুরাং পয়সা খরচ না
করিয়া CIMS আহান লবেলা। হাবি নুয়ারার নাঙর লগে
ঔতার হজকর নাঙ, বার ঔতার ডোজ ঔতা দেছি।
জনমহানরকা নিশ্চিত্ত অইলে নাই।

চন্দ্রে অবিশ্বাস করানির কারণ নেই। যে নিংসা
আচুলানিহানে ছয় বছর এহান মোরে হিন দেব তাও অউ
নুয়ারা ঔহানল হিনপেইলগ। বেটনেসল খেয়া এবাকা বাল্য
অছে, গারিগউ খানি আহান হরতেছে, মিয়ো দি আকখুরুম
খেয়া চাছু। বেটনেসল খেইলে দি আকদিন বাল্য অয়া
থাইতার। মোর ডাক্তর ঔগয় সুপ নাকরের। বাধাদের এতা
হজক খানাহান। ধমকেয়া পরলেই আহান করের। সুপক
খানা নাদের হজক ঔতা। চন্দ্রই মুকসি দিয়া মাতল -
নুয়ারাহান বাল্য অইলে তোর ডাক্তর ঔগয় কিতাতে
খেয়তই।

রাজদ্বারে শাশানেচ---। মিয়ো শাশান বন্ধগ অছিল।
চন্দ্র মরানির পিছেদে হাবিয়ে দুঃখ করিয়া মাতলা নিজে
নিজে হজক খানার ফলহান এহান। চন্দ্রর লয়ইলগা দিন
ঔহানি নাটকর সাদে অছিল -গ্রিক নাটক -যেপেই বিয়োগান্ত
পরিণতিহান হাবিয়ে হারপাছি কিন্তু করানিরতা কিংতাউ
নেই। পরিণতির ঔবারাদে নিয়তিয়ে ঠেলেয়া নেরগা।

পনরো বছর বেটনেসল খানার পিছেদে চন্দ্রর গারিগর
রক্ষা ব্যবস্থা ঔহান বাগে পড়েছিলগা অ্যাড্রেনাল গ্লেণ্ডগই
হরমোন হংকরানির ক্ষমতা লয় পড়েরগা। এরে অবস্থা
এহানাং বেটনেসল বন্ধ করলে রাডপ্রেসার বিপজ্জনক ভাবে
কমে পড়তইগা, গারিগই কুনো আঘাত সহ্য করে নুয়ারতই।
ঔবাকা বেটনেসল বন্ধ করানি ঔহান ডাক্তর চ্যালেঞ্জ আহান।
রকতর হরমোন ঔতা মওয়া মওয়া যেকুনো বিপদরকা প্রস্তুত
থানা বার অতি আধুনিক হাস্পাতাল আগং নুয়ারগরে থনা।
বেটনেসল দিলে যেসাদে খানি খানি করে হাতদিনরমা হজক

কমেয়া আকুবালা হজক বন্ধ করেদেনা থকর ঔহান চন্দ্র ক্ষেত্রত সম্ভব নাইল। এহান বেগই হারপাছি ঔগই এরে কাফামে বেটেনেসল বন্ধ নাউ যাকরতাই। নিয়াম ডিলো পড়েছিলগা। চামড়াং ঘা নিকুলেছিল। যত নমুনার চামড়ার ঘার হজক আছে ঔতা আকতার পিছেদে আকতা নিজরাং ব্যবহার করিয়া চেইল কত বছর। আত জাং ফাটিয়া পানি নিকুলানি অকরল।

ঔতার পিছেদে হাবিয়ে জোর করিয়া চর্ম বিশেষজ্ঞ আগরাং নিলাগা -চন্দ্রে। আজিকালি মানুরতা অসমানবোধ নিয়াম। ঔহানলো ডাক্তর ঔগই চন্দ্রে হর্মোন বিশেষজ্ঞ আগরাং যানারকা না মাতল। চন্দ্র ভাগ্যহান খারাপ। তা যে নুয়ারাহানল ভুগল, ডাক্তর ঔগউ ঔ নুয়ারাহানল ভুগল। দিয়োগীয়ে আত্মস্তুরীগি। ঔ ডাক্তর ঔগ কলিকাতার দামি ডাক্তরগ। দামি দামি হজক ইকরেদিয়া মাতল- না অমাটিক কিংতাউ নেই। মোর হজক এতা খেইলেই বালা অইতেই। বেটেনেসল কিংতাউ না মাতল। তার এরে কাম এহানরকা আরাক দেশ আহান অইলেতে ডাক্তর ঔগরতা জেল অইলইছ। এহানতে ভারতবর্ষ নাই।

আগরতলাত আয়া চন্দ্রই ঔ ডাক্তর ঔগর হজক খেইল। খেয়া ম্যালিনা অইল। চন্দ্রে আরাক চর্ম বিশেষজ্ঞ আগরাং দেহেইলা। ঔগই হজক বন্ধ থয়া চেটা করল কতদিন। বেটেনেসল বন্ধ করল, কাম নাইল। চন্দ্র অবস্থাহান আরাকৌ খারাপ অইল। আরাক ডাক্তর আগরে দেহেইলগা চন্দ্রই। তার চিকিৎসালো খানি আলইলতাই বার কলিকাতার ডাক্তর ঔগর দামি হজক খওয়ানি অকরলা। এ খুরুমতে আকগয়ী জিংতা করে নুয়ারলা চন্দ্রে। গারিগ সম্পূর্ণ নষ্ট অছিল চন্দ্র -কিয়া বুললেতে বেটেনেসল বন্ধ অছিল। চন্দ্র মরিল এহানরকা দায়ি কুংগ ঔহান মাতানি কিংতাউ নেই কথাহান -কিন্তু ঔহান মাতলে যে অবস্থাত পড়তৌ ঔহানেই ডাক্তর কথাহান। সাধারণ ভাবে মাতিমগ বুললেতে চন্দ্র বারাদেও যেতাও অয়া থাক, ডাক্তর এতাই চন্দ্রে সামগ্রিক বিচার আহান নাকরেছি ঔহানাং সন্দেহ নেই। বিশেষ করিয়া কলিকাতার চর্মরোগ বিশেষজ্ঞ ঔগই।

চন্দ্র মরিল এহানাং আমার য়ারিহান লয় নার। চন্দ্র মরানি এহানে পরিবার আহান নষ্ট অইল, চন্দ্র মরানিয়ে। আমারতা মারূপ আগ নেয়ইল। ঔহানে চন্দ্র মরানিল মোর কথাহান অকরানি মনাউরি।

ডাক্তরগই তার পেসেন্টগরাং কতিহান দায়বদ্ধ থাইতই ঔহান আমেরিকার সাদে আমার দেশেউ লেপকরে দেনা থক। আমি লেরিক

তামকরেছি এতাই হারপাছি, ডাক্তররতাউ ভুল থাইতে পারে। কিন্তু কুং হান ভুল তার, কুং হান অকর্মণ্যতা বা উদাসীনতা অউহান আমি হারপানি থক। মি এরে অবস্থাত পড়লেতে আইনর সাহায্য নিলুগাইছ -ঘুমে আছি নির্লিপ্ত ডাক্তর ঔতারে হজাক করানিরকা।

এগদে চন্দ্র সাদে আরতা যেতা আছি, নিয়াম সিং মানু, নিজে নিজর ডাক্তর, তানুরকা বুলিয়া মোর সতর্ক বাণীহান অইলতাই -আমার ডাক্তরি শাস্ত্র এহান এবাকাউ ঔসাদে উন্নত নাছে -আপনে হজকল গেটি খেললেউ আপনারে জিংতা করিয়া থনা যাকরতই। সাবধান। নিজে নিজে হজক লয়া, ডাক্তরি লেরিক আহান চেয়া ডাক্তরি না করবাং। আপনারতাউ চন্দ্র গতি ঔহান অইতই।

মি হুদা বেটেনেসলর নাঙ দেছু, এহান অনায়াহান। ঔহানল নিংশা আচুলানিং (হাঁপানি বা অ্যাজমা) যেতা যেতা হজকর অপব্যবহার অর বার যেতা ডাক্তরর উপদেশ নায়া খানা থক নেই, ঔতার তালিকা আহান দিয়োরি।

বেটেনেলন, কর্টসমিল, কটিনা, কটোফেন, ডেল্টা এফেলিন,

হিষ্টাপ্রোড, পেরিড্রন, লেডারকর্ট, ওয়ালাকর্ট, উয়াইসোলোন, টেড্রাল সি, বেটেনেসল, বিটাকটরিল, ডেকাড্রন, ডেল্টা কটরিল, ডেস্কোনা, কেনাকর্ট, ওয়াইমিজোন, সেলেন্টোন।

৪০৫

জিন্দেগী

মূল: মীনা সুব্বা, অনু: মনীন্দ্র কুমার

জিনা এহানরে মি কি রংল সাংকরতু ?
জিনা এহানরে মি কি অর্থল বাগতু ?
কুন সময় কলখারেই আগং থায়া
হুদালা কলখেরির সাদে রহিরী জিন্দেগী ।
কুন সময় চৌরিয়া বৌহানর সাদানে
ফরদিয়া থানা মনেইরী জিন্দেগী,
কুন সময় নিজঝা মারিয়া ফাম আহানাং
ওমদিয়া বয়া থানা মনেইরী জিন্দেগী ।
কুন সময় রিস্তার পেডেলর সাদানে
চিকারি দিতে থাইরী এ জিন্দেগী,
কুন সময় ভিখারীর টিনর টেমাগর সাদানে
পারায় পারায় রহিয়া থাইরী এ জিন্দেগী ।
কুন সময় বাজারর বয়-বস্তুর তাং এহানে
দর ফর করে নিংশা চেপইরী জিন্দেগী ।
জীবন এহানরে মি কুং বাংলাগত থৈতু ?
জীবন এহানরে মি কুং উপুগং সামালতু ?
ফুরসতর ঘড়িরমা গ্রেপ্তার অছে জিন্দেগী ।
ব্যস্ততার বৌবলুনিং পরায়া অছে জিন্দেগী ।
জোনাক তাল করিয়া বাছেইরী এ জিন্দেগী
কুন সময় প্রেমিকারে নিংশিং ঐয়া চিঠিৎ
জাল বুনে বুনে থাইরী এ জিন্দেগী ।

মেজর নেপ্রা

খোওয়াইরাকফাম ফণী কুমার সিংহ

মেজর নেপ্রার যারিহান হুনানি মনেইলে, মণিপুরর ইতিহাসর পাতা কতহান মেলানি লাগতই। রস নাপেইলেউ হুনানিতে লাগতই, কিয়া বুন্নে, যারি এহান ইতিহাস আশ্রিত।

মারজিৎ মহারাজ, ১৮১৩ খৃঃ (১৭৩৫ শঃ) ব্রহ্মদেশর (আওয়া) রাজার পাংকালল মণিপুরর রাজ সিংহাসনে বহেছিল। কিন্তু, ১৮১৯ খৃঃ (১৭৪১ শঃ) বার আওয়ার তুল লালফামে হারিয়া কাছাড়ে আশ্রয় নেনাং বাধ্য অছিল। তার রাজত্ব কালর পিছেদে, মণিপুরর রাজসিংহাসনে ৭ বছরে ৭গ রাজা বহেছিল। এহানরে মণিপুর ইতিহাসে “চহী তারেং খুন্তাকপা” বলেছি। ঔ সময়, মণিপুর এরদিয়া বহু মানু, ময়াং লৈবাকে, অর্থাৎ কাছাড়, শিলেট, আসাম, ত্রিপুরাং আশ্রয় নেছিলগা।

এ ৭ বছরে ৭গ রাজার ভিতরে, ১৮২১ খৃঃ (১৭৪৩ শঃ) মহারাজ গম্ভীর সিংহ মাত্র ৬ মাহা রাজা পালছিল। আওয়াই তাঁরে সিংহাসন চ্যুত করলে, মহারাজ গম্ভীর সিংহ কাছাড়ে কাছারি রাজা কৃষ্ণচন্দ্রর আশ্রয়ে অছিল। স্বর্গীয় ভাগ্যচন্দ্র মহারাজর বংশর নিঙল, রাজকুমারী ইন্দু প্রভারে কাছারি রাজা কৃষ্ণচন্দ্ররায় বিয়া দেছিল। ঔসময়, মহারাজ গম্ভীর সিংহ কাছাড়ে আহানির আগেই, মহারাজ মধুচন্দ্র, মহারাজ চৌরজিৎ, মহারাজ মারজিৎ মণিপুরেৎত পলিয়া আয়া কাছাড়ে আশ্রয় নেছিলগা। মহারাজা মারজিৎ কাছাড়ে আহানির আগেই, কাছারি রাজা কৃষ্ণচন্দ্র স্বর্গারোহন করেছিল। কাছারি রাজা কৃষ্ণচন্দ্র দৌ অনার পিছেদে তাঁর বেয়ক গোবিন্দচন্দ্র কাছারি রাজা পালছিল। ঘটনা চক্রে,

মারজিৎ মহারাজে কাছারি রাজা গোবিন্দ চন্দ্ররে মারেছিল। উহানে মারজিৎ মহারাজরে “ময়াং ওয়া” বলেছিল।

ঔবাকা, কাছাড় তানুর করায়ত্বে অছিল।

১৮২১ খৃঃ মহারাজ গম্ভীর সিংহ, প্রতাপগড়র পাথারকান্দির বাজারর দক্ষিণে রাজধানী পাতিয়া অছিল। মারজিৎ মহারাজ হাইলাকান্দির সরসপুরে, বার চৌরজিৎ মহারাজ বদরপুরে রাজা পালয়া অছিল।

মহারাজ গম্ভীড় সিংহরে রাজ্যাভিষেক করেছিল। বামুন তিনোগী এলাতাই –হাজ্জাবম নিমাই চান্দ ঠাকুর (ঘাঘরার গদীশ্বর), তিলেশ্বর শর্মা(মাদই গাং, ধর্মনগর), বার রাজগোপাল মিশ্র। মহারাজ গম্ভীর সিংহ পাথারকান্দিত রাজা পালয়া থাইতে বটিশ সরকারর লগে তাঁর মিত্রতা অছিল। বটিশর মদৎল, মহারাজ গম্ভীর সিংহয় “মণিপুরী নিঙলপী” সৈন্য তেঙেল আহান হংকরেছিল। আওয়াই ১৮২৪ খৃঃ বদরপুর আক্রমণ করলে, গম্ভীর সিংহয় ঔ নিঙলপী সৈন্যলো বটিশ সৈন্যর পাংলাকল, বামীজ আক্রমণ প্রতিরোধ করেছিল বার বামীজ সৈন্য ধ্বংস করেছিল। বটিশর অস্ত্র শস্ত্রলো, ঔ নিঙলপী সৈন্য উতারেল, ১৮২৪ খৃঃ শেষেদে ইমা লৈবাক মণিপুর পুনরুদ্ধার করিয়া ১৮২৫ খৃঃ জেঠ মাহার ২৮ তারিখে রবিবার, ৩৯ বছর বয়সে বার মণিপুরর মহারাজা পালছিল। মারজিৎ মহারাজৌ, গম্ভীর সিংহর লগে মণিপুরে আহেছিল। মহারাজ চৌরজিৎ নবদ্বীপে গিয়া দেহ ত্যাগ করেছিল।

মহারাজ গম্ভীর সিংহ ১৮৩৩ খৃঃ (১৭৫৫ শঃ) পৌষ মাহার বৃহস্পতিবারে ৪৭ বছর বয়সে পরলোক গমন করেছিল। মহারাজ গম্ভীর সিংহর পুতক “চন্দ্রকীর্তি” মাত্র ২ বছর বয়সে বাপকর সিং হাসনে বহেছিল। রাজাগ নাবালক অনায়, মহারাজ গম্ভীর সিংহর বেয়ক “ইবুঙো নরসিংহ” গিরকে রাজ্যর শাসনভার নেছিলগা।

১৭৬৫ শকঃ, ৮ই পৌষ, শনিবার সেন্দাং “নবীন”

বুলিয়া মণিপুরী গাবুরাপুয়া আগয় থাং জাংলো ছেদেয়া প্রশাসক নরসিংহরে জখম করলে, মহারাজ চন্দ্রকীর্তি, মালক “ইবেমা কুমুদিনী” মহারাণীর লগে গিয়া শিলেটে বটিশর আশ্রয় নেছিলগা।

বটিশর থতাং মৌ অন্তরে হু। চন্দ্রকীর্তি মহারাজরে বটিশে শিলেটে মণিপুরী রাজবাড়ীং কন্মোঙে নজর বন্দী করিয়া থৈলা। দোয়াদে মাতলা রাজার সুরক্ষা। গুরখা সৈন্য পাহারাত থৈলা। থাঙ্গাল থৈলা। লগে সেনাদ্বারী হিসাবে মহারাজ চন্দ্রকীর্তিরে দেহাহনা করানিরকা “নেপ্রা”রে থদিলা। নেপ্রেম চাওবা। মহারাজরও বিশ্বস্ত, বটিশরও বিশ্বস্ত অছিল।



চন্দ্রকীর্তি, সিংহাসন ত্যাগ করানির পিছে, মণিপুরর রাজ সিংহাসন বৃহদিন শূণ্য ওইয়া আছিল। প্রজার চাপে, ১৭৬৫ শঃ ১৯ মাঘ, বৃহস্পতিবারে নরসিংহ ৫১ বছর বয়সে মণিপুরর রাজ সিংহাসনে বহেছিল। নরসিংহ মহারাজ, ১৮৫০ ইং (১৭৭২ শঃ) ১৮ই বৈশাখ, বুধবারে দেহত্যাগ করেছিল।

নরসিংহ মহারাজ মরানির লগে লগে তাঁর বেয়ক, দেবেন্দ্র মণিপুরর রাজ সিংহাসনে বহিল। মণিপুরর প্রজা নরসিংহ বার দেবেন্দ্রর কুশাসনে অসন্তোষ্ট অছিল। তানু চন্দ্রকীর্তি মহারাজরে বার মণিপুরর রাজাগ হিজাবে আনানির সুযোগ বিছারেয়া থাইলা। এ পৌ এহান পানায়, বৃটিশ সরকারে শিলেটে মণিপুর রাজবাড়িৎ চন্দ্রকীর্তি মহারাজর পাহারা আরাকৌ কটকটিয়া করলা। চন্দ্রকীর্তি মহারাজর ও সিবেরি বেষ্টনিহানর হেরেদে নিকুলিয়া পলিয়া যানার কুনো সুরাক নেয়ইল।

এসাদে অবস্থাত, মহারাজর সেবাদারি, নেপ্রা বার থাঙ্গালে ওয়াশাক করলা, যেসাদেউ তানুর ঠৈ কাংকরিয়া অইলেউ, চন্দ্রকীর্তি মহারাজরে ও নজর বন্দী দশাৎত নিকালেয়া মণিপুর্নে দিয়া পেঠা দেনি লাগতই।

নেপ্রাই থাঙ্গালে গোপনে পরামর্শ করিয়া ঠিক করলা - নেপ্রাই চন্দ্রকীর্তি মহারাজর বেশ ধরিয়া রাজা মালইয়া রাজবাড়িৎ থাইতই।

থাঙ্গালে রাজারে লক্ষ্মীপুর্নে ফৌকরে দিতৈ। রাজবাড়িত ধরা পড়িয়া নেপ্রা বৃটিশর আতে মরলেউ মণিপুর বাসীতে জিংতা অকা। নেপ্রায় আগপিছ খালকরিয়া বুদ্ধি আহান নিকালল-তা কাহানি নুয়ারা চেলপা অলয়া খুণ্ডেই আহানলো মুর, গার, নাক, কান গুড়িয়া বান্দিয়া থাইতই। রাজারতা নুয়ারা অছে বুলিয়া ওউসাদেই কতদিন আহান রাজারকা হজক পাত আনানেনা বার দৌওরাং ফলমূল কাং করিয়া পূজা কিতা দেনা আদি করতই। বৃটিশে তানুর এ্যালোপেথিক ডাক্তরল রাজার নুয়ারা চেইক বুললে, মণিপূরীয়ে এ্যালোপেথিক হজক নাখেইতারা, মেইপার হজক, মেইপারল করুয়েইয়া বার দৌদুকের পূজা পাতল করিয়া নুয়ারা বালা করতারি বুলিয়া রাজারে মেইপারাং দেহুয়েইয়া হজক পাত করুয়েইতাই। এতা এতা পরামর্শ করিয়া নেপ্রা বার থাঙ্গাল তানুর প্লেনমতে আগ বাড়লা। কন্মুঙে আছিলি সিবেরি অফিসার উগরে উসাদে মাতিয়া মাতলা - বৃটিশ লেফটেনান্টগ আইলে রাজা নুয়ারা অছে পৌহান দিয়া দেকা বার রাজারতা মাতলা উসাদে চিকিৎসা করুয়ানি লাগতই এহান মাতে দকা। সিবেরি উতাই হবা অছে বুলিয়া দৌওরাং হমাউ কাংকরলা, রাজার নুয়ারাহান তুরা ঐয়া বালা অক বুলিয়া।

বৃটিশ লেফটেনান্ট গিরক ওগরে সিবেরি অফিসার উগই এহান বাগেইলে, লেফটেনান্ট গিরক উগয় হবা অছে বুলিয়া যাকরল।

অউমতে, নেপ্রা কতদিন আহান মুর, গার, নাক, কান খুণ্ডেইল বাধিয়া, ডাঙর কুপাং আহানাং নানান জাতর ফলমূল

বুজিয়া ডাঙর ডিগল দলা ফুতি আহানলো কুপাং হান গুড়িয়া, রাজার নুয়ারা বালা অক বুলিয়া রাজবাড়ির কাদার মন্দির উগৎ, রাজারকা বুলিয়া দৌওরাং উতা কাং করাং যারগা। আলয়া আহিলে দৌর প্রসাদি ফলমূল উতা সিবেরি উতারেউ বিলাদের। বার মেইপারাংত রাজারকা হজক পাত আনানেনা বুলিয়া দুয়াদে বার কন্মুঙর ভিতরেদে আনাযানা করিয়া থাইল। ওঁসাদে করতে দোয়াদে গিয়া থাঙ্গালরকা হবা ঘোড়া দুগ আহান ঠিক করেদিয়া থাঙ্গালর লগ লাগাদিয়া আহিলগা। নিক্কা এসাদে আনাযানা করিয়া থাইল হানতে, সিবেরি উতাই তারে আর সন্দৈ নাকরলা। বৃটিশ লেফটেনান্ট উগয়ো আর নিয়াম বেরাচেরা নাকরল।

আকদিন নেপ্রায় সিবেরি অফিসার উগরে মাতল - রাজার নুয়ারাহান জবর অছে হানতে রাজবাড়ির কাদার মেইপাগরে আনিয়া দেহুয়ানিৎ পরলাং। লেফটেনান্ট সাহেবরে বাগাদেই, মেইপা উগরে ঘোড়াগল আনিয়া কন্মুঙে রাজারে চাকহা। লেফটেনান্ট সাহেব গিরকে যাকরল। বার সুবেদার, সান্ধীরেউ উসাদে মাতে দিল।

সেন্দাৎ বরণ পিনপিনি বেলাছে। রাজবাড়ির কাদার মন্দিরে সেন্দারতির ঢাক, ঢোল, জাল, করতাল, মেবং, কাংসেই বাজের। থাঙ্গাল, মেইপাগরে আনানিরকা ঘোড়া দুগল গেলগা। নেপ্রাই রাজারকা দৌওরাং ফলমূল কাংকরানি অছে বুললে, সুবেদার সান্ধীরে হবা অছে, যাগা বুলিয়া তানুয়ৌ প্রভুরাং, রাজা তুরা ঐয়া বালা অক বুলিয়া হমা কাংকরলা। রাজারে, নেপ্রাই তার নিজর ফিজৎ কিতা কাতা হবাক পিদা উরা দিয়া, তা বান্দের খুণ্ডেই উহানল রাজার মুর, গার, নাক, কান গুড়িয়া হবাক বান্দের দিল। ফলমূলের কুপাং হান দলা ফুতিহানলো ঘুরে দিয়া রাজারে সালকরেদিল। নিজে, রাজার ফিজৎ উতা পিদল। অন্তিম যাত্রাৎ সালৈয়া রাজায় নেপ্রারে কলকরিয়া মাতল - হে নেপ্রা ! তোরে এপেইৎ থ দিয়া যানা এহানতে হারপা হারপা তোরে অবধারিত মরণর থতাৎ কাংকরিয়া যানাহান। তোরে মরণর থতাৎ বরাদিয়া মি কিসাদে ঠৈগল যিতুগা। রাজায় আহির পানি বেলার। নেপ্রাইও আহির পানি বেলার। নেপ্রাই মাতে - হে মহারাজ, মি অধম এগর জীবন এহানর কি দাম। মহারাজা গিরক মণিপুর লৈবাকে গিয়া রাজা পালৈয়া মণিপুর বাসীরে নুঙেই নুংশিল পালকরে দিলে মোর জনম এহান স্বার্থক ঐতৈ। আর ডিল নাক। মহারাজ ! সাল জিকগা। থাঙ্গাল বাছেয়া আছে। মহারাজ চন্দ্রকীর্তি, নেপ্রার বেশে ফলমূলের কুপাং হানল তাপপ তাপপ নিকুলিয়া গেলগা। সান্ধী সুবেদার হান্ধিয়ে - দৌওরাং পূজা কাংকরাং যারগাতা ! এ হবা অছে যাগা। আমিয়ৌ, রাজার নুয়ারা তুরাক বালা অক বুলিয়া এপেইৎ প্রভুরাং প্রার্থনা কাংকরিয়ার। নেপ্রাই, রাজাগিরক পথে আপদ বিপদ নায়া ইক্ষল ফৌয়কগা

বুলিয়া দৌ হমাদিয়া রাজা ঘুমজার পালক হানাং মুরগার জাপদিয়া দৌ সলকরিয়া থাইল।

গোপন পরামর্শ মতে থাঙ্গাল মন্দিরগ বেলেয়া খানিগ্না দূরেইং জঙ্গল আগং ঘোড়া দুগল বাছেইয়া আছিল। নেপ্রাবেশী চন্দ্রকীর্তি মহারাজ ঔপেয় ফৌয়নির লগে লগে ঘোড়াগীং চড়িয়া জঙ্গলর সাম পথেদে কীরর গতিলো গেলাগা রাতি শিংনাত শিলেট লালয়া বিয়ানে লক্ষ্মীপুরে ফৌয়েলা।

এবেদে সুবাদার সান্ধ্যীয়ে কল্পুঙে হমেয়া দেখতার। রাজাগ ফামহানাং ঘুমজিয়া আছে। লগর ঘিয়োগী নেপ্রা বার থাঙ্গাল নেই। তানু নেপ্রা বার থাঙ্গালরে গৈগ এয়া বিসারতারা। এসাদে করতে মাদানেদে লেফটেনান্টগ আছিল। সুবাদার, সান্ধ্যী, লেফটেনান্ট হাক্ষিয়ে ফামহানাং গিয়া রাজারে উঠেয়া দেখলা -রাজাতে নাগৈ, রাজবেশে নেপ্রা। নেপ্রারে কিলানি বারানি অকরলা। সাহেব উগই নেপ্রারে কত আংকরল। নেপ্রার জুয়াপ আকহান -মহারাজ গেলগা।

কুংপেই গেলগা, কিসাদে গেলগা, কতো আংকরলা, নেপ্রার জুয়াপ আকহান -মহারাজ গেলগা।

সাহেব উগ যাম ছৌয়েল। নেপ্রারে কিলেইতে কিলেইতে মরাগ করলা। মরিল বুলিয়া জঙ্গল আহানাং বেলা দিলাগা। সাহেব উগয় আরাকৌ সিবাই মাছি আনিয়া দল আহানরে শিলেটর মণিপুরী মানুর ঘরে ঘরে খানা তালসি চালুয়েইল। আরাক দল আহানরে বনে জঙ্গলে কাছাড়র পথেদে বিসারানিং দিয়া পেঠেইল।

এবেদে নেপ্রা না মরিয়া ঠৈগ ডুক ডুক করিয়া আছে। উঠিয়া বহানির শক্তিহানপেয়া গারিগং নেই। পথর কাদাং পরিয়া আছে না মরেছে দেখলে ধরিয়া নিয়া মারতাইগা খালকরিয়া, কুনমতে আমকুরি করিয়া জঙ্গলর ভিতরেদে হমেইলগা। বার বেছশ এয়া পড়িল। হুশহান আছিল ঔপেয় দেহের রুক কাপেকুরা আগ বানুক আহান ধরিয়া কাদাহানাং উবা এয়া তারে চার। ঈংগীতে কাঠুড়িয়াগরে কাদাং ডাকল।

কাকালিং আছে হোনার চেইন উগাছ দেহুয়েইয়া মাতল - এগাছ নেগা। মোরে চিকিৎসা করিয়া জিংতা কর। জিংতা এলে তোরে আরাকৌ ধন পয়সা দিতৌ। কাঠুড়িয়াগয় তারে লেম্পালে করিয়া তার ঘরে নিলগা।

এবেদে মহারাজ চন্দ্রকীর্তি লক্ষ্মীপুরে



ফৌয়নির পৌহান পানায় হাজারে হাজারে মণিপুরী তারে দেহা করানিং য়মৈলাহ। হাক্ষিহানে মহারাজর তুল ইক্ষালে যানার ইচ্ছা ব্যক্ত কৈলা। বার রাজার বারাদে এয়া যুদ্ধ করানি মনেইলা। চন্দ্রকীর্তি মহারাজ বার থাঙ্গাল লৌশিংপার তুল হাক্ষিহান ইক্ষালে গেলাগা। ইক্ষালবাসী হাক্ষি ইমৈউতে মহারাজ নরসিংহ বার মহারাজ দেবেন্দ্রর কুশাসনে ছৌয়েয়া আছিল। মহারাজ চন্দ্রকীর্তিরে দেহানিয়ে হারৌ এয়া জয়ধ্বনি দিতে দিতে অমকরে য়মৈলাহ। এহান দেহানিয়ে মহারাজ দেবেন্দ্র সিংহাসন এরেদিয়া চরেদে পলেয়া গেলগা। গিয়া কাছাড়ে আশ্রয় নিলগা। মহারাজ চন্দ্রকীর্তি, বিনা যুদ্ধে ১৮৫০ ইং (১৭৭২ শং) শ্রাবণ মাহার ৩ তারিখে, ইরেইর দিনে, মাত্র ১৯ বছর বসে মণিপুরর রাজ সিংহাসনে বহিল।

রাজা পালৈয়া, চন্দ্রকীর্তি মহারাজে চৌরিয়াল লাগেয়া শিলেট কাছাড়ে নেপ্রার পৌ লৈল। কুনো পৌ খবরাখবর নাপেয়া পিছেদে শিলেটে বৃটিশ লেফটেনান্ট উগরাং সরাসরি নেপ্রার পৌ আংকরল।

সাহেব উগোয় রকত মাঙ মাঙ নেপ্রা মরেছে বুলিয়া পৌহান দিল। চন্দ্রকীর্তি মহারাজ জবর হিন পেইল। নিজর বেয়ক আগ নেয়ইল পারা অকলৌকরে কাদিয়া বাহুয়েইল। নেপ্রার গুপ্তীর মানু ডাহিয়া নিজে কিরা ধরিয়া নেপ্রার শরাদ্ধহান রাজসিক করে কৈল। তারে জিংতা কর্তেগা নেপ্রা অকালে বৃটিশর আতে দৌর খয়া পেইলগা এহান অন্তরগংত মিটা নুয়ারিয়া থাইল।

এবেদে নেপ্রা, কাঠুড়িয়াগর চিকিৎসায় খানি বাল। অনায়, ঔপেংত নিকুলিয়া জঙ্গলর পথেদে আটে আটে মণিপুরী ঘর বিছাড়া বিছাড়া রাতি কাটা কাটা কুনোমতে শিলেট সীমা লালৈয়া কাছাড়ে আয়া হমেইল। কাছাড়ে তার খাংনাপার ঘরে থায়া মহারাজ চন্দ্রকীর্তির খবর পেইল। চন্দ্রকীর্তি মহারাজ মণিপুরর রাজ সিংহাসনে বহেছে খবর পেইয়া তার হারৌর সীমা নেয়ইল। নুয়ারা গারিগল লক্ষ্মীপুরে গেলগা। লক্ষ্মীপুরে তার মারূপ আগর ঘরে থাইল।

মারূপ উগয় তারে হাবিতা বাগেইল। নেপ্রারে বিছড়িয়া রাজার কিতা কিতা করেছে। শিলেট, কাছাড় চৌরিয়াল দিয়া পেঠেয়া ছানেছে। পিছেদে বৃটিশ লেফটেনান্টগরাং খবর করেছে। উগোয় নেপ্রা মরেছে পৌহান দিলে নেপ্রার শরাদ্ধ হান তা নিজে কিরাং বয়া রাজসিকভাবে

কৰে দেহে। এবাৰকো নেশ্বৰ কথা রাজ্য না পাহৰেছে। তাৰ আত্মোৎসৰ্গ, দেশৰকা আত্ম বলিদান এবাৰকো রাজ্য গেয়া ধাৰ। এহান ছনিয়া নেপ্ৰা আৰ লক্ষ্মীপুৰে থানা নাকৰল। মাৰুপ উগোয় নেপ্ৰাৰে বইয়া ইক্ষ্ণালে নিয়া দেনাৰকা ডুলি আগ ঠিক কৰে দিল। নেপ্ৰা ইক্ষ্ণালে যৌয়েলগা।

ইক্ষ্ণালে গিয়া নেপ্ৰা, নিজৰ ঘৰগুণ নাগেলগা। রাজ দৰ্শন কৰানিৰ সালে পয়লাই, রাজ কন্মুঙে গেলগা। ঔবাকা রাজাৰ ভোজনৰ সময় হান। কন্মুঙে গিয়া রাজাৰ দুয়াৰী, মন্ত্ৰী উতাৰাং হমা দিয়া মাতল -মি এবাকা রাজ দৰ্শনে আইলু সময় এহান মাতামহান নাইল। কিন্তু মি রাজ দৰ্শনৰ খৌৰাং এহান আটকা নুয়াৰলু। হুদা এহান মহাৰাজা গিরকরাং ফৌকৰে দেই যে, নেপ্ৰা বুলিল মানু আগ ময়াং লৈবাকেত আয়া মহাৰাজাৰ শ্ৰীচরণে ভক্তি কাংকরানি মনার। কন্মুঙৰ ভিতৰে আছিল সান্ত্ৰী উতায়ে এ কথা বাৰ্তা এতা ছনলা। সান্ত্ৰী আগয় মহাৰাজৰে পৌহান দিগা বুলিয়া ভিতৰে যিতেগাই দেখল মহাৰাজা ভোজনে বহেছে। পৌহান দেনা নাদানি দ্বিম দিশা ঐয়া, নেপ্ৰা বুলিয়া উচ্চারণ কৰতেই মহাৰাজে কুংগ, নেপ্ৰা বুলিয়া খাং লাগিয়া উঠিল ঔবেদে ভাতৰ চাংলুকহানাংত উঠিয়া ভাতৰ আতহানলগাই বহিৰ্ভাৰে গেলগা। মহাৰাজাৰে দেহানিয়ে নেপ্ৰা মাটিহানাং সান্ত্ৰীকে দন্ডবৎ দিয়া পইল। নেপ্ৰাৰে দেহানিয়ে মহাৰাজে নিজৰে পাহৰিয়া দ্বিয়ো আতলো নেপ্ৰাৰে কলকরিয়া ধরল। ধরিয়া কন্মুঙৰ ভিতৰে তাৰ কুঠাংগ নিয়া বহুয়েইলগা। নেপ্ৰাৰ থতাংত এদিন হাব্বিৰ নেপ্ৰাৰ য়াৰি মনহান দিয়া ছনল। তাৰে হিনুয়েইয়া নুয়া ফুতি ফালি পিদুয়েইয়া মহাৰাজে তাঁৰ লগে ভাত খণ্ডয়েইয়া কন্মুঙে ঘুমজুয়েইল।

পিছেকার দিনে রাজসভাত নেপ্ৰাৰে হাব্বিৰ তুল পরিচয় কৰুয়া দিল।

মহাৰাজ্য সভাহানাং, নেপ্ৰায় কিসাদে তাৰে সেবা কৰল, কিসাদে চাতুৰিলো তাৰে নেপ্ৰাৰ বেশ ধৰুয়েইয়া নিজে রাজাৰ বেশ ধরিয়া সেন্ধাং মরণৰ কুগং হমেয়া দেশহানৰ সালে রাজাৰে জিংতা করিয়া থাঙ্গালৰেল ইক্ষ্ণাল মাটিং ফৌকৰে দিলতা। তাৰ অপূৰ্ব দেশভক্তি, মণিপুৰ বাসীৰ গজে শ্ৰদ্ধা, হুদিয়েপা রাজভক্তিৰ পামতাম্মা দিল ঠাৰ রাজাৰতা নেই। ঔসভাত মহাৰাজে নেপ্ৰাৰে ঔদিনেংত “মেজৰ নেপ্ৰা” উপাধী দিয়া রাজসভাত উপযুক্ত পদফাম আহান দিয়া নেপ্ৰাৰে সম্মান জানেইল। এহান ১৮৫০ ইংৰেজীৰ ঘটনাহান।

৪০৪

গোসাইব পুতক



লেখকঃ ডঃ ডুড মোহন গোস্বামী
অনুবাদঃ সুনীল কুমার সিংহ

আকতা তারতা গাঙহানৰ কথা মনে পড়িল। লগে লগে তা কণিৰ কথা নিংশিঙ অইল। কতিবছৰ তা গাঙে নাগেছেগা উহান আতৰ আঙুলীত লেহাত লাগিল। এক, দুই, তিন---বিশ---সাতাইশ---চল্লিশ, এমাটিক নিয়াম বছৰ তা গাঙে নাগেছেগাত।

তাৰ নিজৰে নিয়াম নিৰ্দয় লাগিল।

১৯৫৬ সনত্ব অকরিয়া ১৯৬০ সন পেয়া এৰে চাৰি বছৰৰ স্মৃতি তা কুনমতেই পাহৰানি নুয়াৰেৰ। উহান কি তা পাহৰে পাৰতে তা। উহান অইলে তা গাঙৰ কথা আকখুকমউ কিয়া মনে নাআনেছেতা -

কিয়া গাঙে নাগেছেগাত - কণিৰ লগ নাধৰেছেতা। কণিয়ে কিজানি এবাকা গাঙে নেই। কণি এবাকা শহৰে থাৰ নিচয়। কণিৰ কুষ্ঠীৰ নাঙহান “ভগবান” বুলিয়া থছি।

হাদি হাদিত চিন্তা কৰতে কৰতে তাৰ মনহান অউলি জউলি অর। গাঙে থাইতে তা কিতা কিতা কৰেছিল, উহান মনে বেলানিত লাগিল। বিয়াস্ত তা রমাকান্তৰে লগে নিয়া বুলানিত গেছিলগা। কিন্তু ছড়ার পাৰেদে তা নাগেছিলগা, কিয়া বুন্ধে ছড়ার পাৰৰ ওবাটি বন উতাংত নিঙলপীয়ে দুয়াত গেছিলগা। তানুৰে দেখলে তারতা লাজ লাগেৰ, উহানল তা এবাকা জেপেইত কলেজগ আছে উপেইতহে বুলানিত গেছিলগা। উ সময়ত জাগা উহানাতউ জঙ্গলগ মাহি আছিল। জাগা উহান সত্ৰাধিকাৰ আগৰ মাটিহান, ইমে পড়িয়া থায়া ছনগ মাহি উঠেছিল। তানু বুলতে -তা, রমাকান্ত বার সম্বন্ধ, তানুউ হাদি হাদিত খুচেই আকেইগী ধরিয়া উবেদে দুয়াত গেছিলগা। উপেইত ফিরিয়া আয়া ঘৰেদে নাহমেয়া সিদা কহার পাৰে গিয়া হিনেয়া ঘৰে হমেইলাগা। আমাৰ এ গাঙে বিয়াস্ত নাহিনেইলে শৌৰে মালক বাপকে খানারতা নাদলা। রমাকান্তৰ বেলায়উ উহান আছিল।

সত্ৰাধিকাৰ উগয় তাৰ পতিত অয়া আছে জমি উহানাত কলেজ আগ খুলানিৰকা বুলিয়া উপেইৰ মানু অউতাৰ আতে এৰে দেছিল। কলেজ এগৰে আজিকাৰ মানুয়ে মহাবিদ্যালয় বুলিয়া মাত্তাৰা। কলেজ বুললেউ হাব্বিয়ে হাৰপেইতাৰা -ইংৰাজী শব্দ এগ অসমীয়া কৰানি লাগেৰ। ইংৰাজীৰ প্রতিশব্দ বিছাড়েয়া অসমীয়ায় হাবাথুরি খানা লাগেৰ। আৰতা যে শব্দ একেবাৰে ঘৰুয়া আছে, কম পাকৰেছি শৌ-জিপুত, মুনি-জেলেই হাব্বিয়ে হাৰপেইতাৰা হান্তে, শব্দ উতাৰ অসমীয়া কৰাৰ কুন প্রয়োজন

আছেতা? অর্থ বিছাড়েয়া হাবাথুরি খানা লাগের, অর্থহান কিহান? "সার্ভিস বুকহান" ইংরাজী শব্দ উহানেই উহানর অর্থহান। এবেদে বুলতে আমার সব সময় লাগের শব্দ উতা আমি প্রায় পাল্হরানির পথে। উহানেই নিয়াম দুঃখর বিষয়হান।

কয়দিন আগে নর্থ গৌহাটি কলেজর প্রতিষ্ঠাপক অধ্যক্ষগর ভাষণ আহান হুনেছিল। কলেজ প্রতিষ্ঠা দিবসর দিনে তা মাতেছিল,-

"শৌ ডাঙর অইলা, কিন্তু নুয়ারা পানি না ছিড়িল", উদ্ধৃতি এহান দেনির প্রধান কারণহানি অইলতায় - "শৌ" বার "নুয়ারা" শব্দ দ্বয়গির টানহান। কলেজ এগ জরম অইলতা আজি বহু বছর অইল, কিন্তু কলেজগর সমস্যা এবাকাউ নালমর। একথা এহান বুঝানিরকা অধ্যক্ষ এগর উপমা এহান ব্যবহার করেছিলতা। আধুনিক অভিধানে তা শব্দ এতার অর্থ বিছারেয়া চাছিল। পিছে তা খালকরেছিল কথা উহানর লগে খাপ খুয়েইয়া কথা উহানর উত্তর পাছিলতায় - প্রবীন সাহিত্যিক তিলক হাজরিকার থতান্ত শব্দ আগ হনিয়া।

তা বার খালকরানি অকরল -বিস্মৃতির বুকগত বহু পুরাণা রীতি -নীতি মাঙয়া গেলগা। গাঙর নিরক্ষর মানুর কথা বুলিয়া, উপভাষার শব্দ বুলিয়া নিয়াম পারা শব্দ আমি হারেইলাঙ। আরতা যে দুগ আগ শব্দ জিংতা অয়া আছে উতাউ আমি গ্রহণ নাকরলাঙ। কিয়া বিল্লে, উতা গ্রহণ করলে আমারে গাওলিয়া মানু বুলিয়া আহেইতাইয় পাউরি। উপভাষার এরে অবস্থা এহানরে ভাষাবিজ্ঞানে পাটোই (patoi) বুলিয়া মাতারা। বার সাংবাদিক হাজরিক মাতের কথা উহানউ নাইগহান নাইগে। এরে গ্রাম্য শব্দ এতারে ধয়া - পাজালেয়া নিঙ করিয়া ব্যবহার করলে নাচলেরহান নাইগে। ঠিক উসাদে উপভাষার শব্দ উতারেউ হেয় বুলিয়া না খালকরিয়া, উতার সম্প্রসারণরকা বুলিয়া সচেতন অইলে উহানরে পার্লে(parle) বুলিয়া মাতারা।

যে গাঙহানর কথা তা পাল্হরিয়া আছিল, উহানর হিসাব করিয়া চেইলে, গাঙহানর মাটিকালি প্রায় ১২ বর্গ কিলোমিটারর চুয়া আছিল। ডিগলেদে ৬ কিলোমিটার, পাথারিয়েদে ২ কিলোমিটার। এহান তা প্রবীন বৈশ্য গিরকরাংত ফোন করিয়া হারপাছিলহান। অবশ্য ডঃ প্রবীন বৈশ্য মাতেছিল -গাঙ এহানর সঠিক মাটিকালি, মানচিত্র আদি পানি মনেইলে মন্ডলগরাঙত পানি যাকরের।

এ শতিকার লোকপিয়ল মতে গাঙ এহানর মানুর সংখ্যা অইলগাতায় একুইশ হাজার। কিন্তু প্ররজনকারি অর্থাৎ বহিরাগত মানু লাগেয়া এপেইর মানুর সংখ্যা প্রায় দ্বিকুরি হাজারর ঘরে গিয়া ফৌওসিগা। কিন্তু তা যেবাকা গাঙে আছিল, অর্থা কুড়ি শতিকার ষষ্ঠ দশকের পয়লাদে, গাঙহানর জনসংখ্যা আছিলতায় মাত্র আট হাজার। তা গাঙ উহান এরা দিয়া আহানির পিছেদে যে কলেজগ হঙছিল

উগর অর্থনীতি বিভাগর মুরব্বীগ আছিলতায় ডঃ বৈশ্য। পিছেদে তা কলেজ উগর অধ্যক্ষগ অছিল বার কলেজ উগোস্ত অবসরউ অছিল। গাঙহানর অর্থনীতির দিক উহান তা হবা করে অধ্যয়ন করেছিল। তারাতই কথা এতা হারপাছিল। তা মাতেছিল -গেলগা শতিকার ষষ্ঠ দশকর গাঙ উহান বিছাড়েয়া গেলগা উহান এবাকা পানা চিল। এবাকা আর আর জাগাত ফুতি বুনতারা শিপিনী উতা আয়া গাঙহান বুজলাগা। বস্ত্রশিল্পর একমাত্র কেন্দ্রগ এ গাঙ এহানরে ইংলেণ্ডর ম্যানচেষ্টার বুলিয়া মাতে পারিয়ার। হোনার লুরির গাঙহান। কিন্তু গাঙহানর কতিহান পরিবর্তন অইল উহান চানিরকা তারতা খৌরাং আহান নিয়াম জবরক অছি, অতীতর সৃতি উতা আহান আহান করে তারতা মনে পড়তে থাইল। এ গেলগা দ্বিকুরি বছরর পরিবর্তনর য়ারি এতা তা আকহান আকহান করে ডঃ বৈশ্যরাংত হারপাছিল। উবাকাত উন্নত আছিল যদিও গাঙহানাত এবাকার ডুকি ফোনর যোগাযোগ নেয়ছিল। তা বেলেয়া আহানির পিছেদেহে গাঙহানাত বিজুলী বাতি আদি আহেছিল। এবাকাতে প্রায় গাঙেই বিজুলীবাতি আছে। মনে করানির কথাহান - আসাম রাজ্য এহানর গাঙ এতার ভিতরে, এ গাঙ এহানাতেই পয়লা বিজুলীবাতি আহেছিল। পিছেদে তা লাইটার কেন্দ্রগ চানিরকা কলিতার লগে গেছিলগা। কলিতা উগ অইলতায় উবাকার নবম শ্রেণীর ছাত্রগ -হাঁহিরাম বুলতারা উগ। তা যেবাকা সপ্তম শ্রেণীর ছাত্রগ উবাকা হাঁহিরাম, শশীন, পরেশ তানু আছিলাতায় নবম শ্রেণীর ছাত্রগী। শশীন মানে শশীন শর্মা, উগ আসামর ভিতরে এম, ই, পরীক্ষাত ফাস্ট অইয়া পাশ করেছিল। তারতা গজর শ্রেণীর লগেই সম্বন্ধহান হবা অয়া আছিল। তা সব সময় হবা ছাত্রর লগেই বন্ধুত্ব করেছিল। গাঙহানর দক্ষিনেদে বয়া গেছিলগা লুইতর পারগত মাদানেন্দে হাঁহিরাম, শশীন বার পরেশর লগে বুলানিত গেছিলগা উহান তারতা মনে পড়ের। লুইতর পারে উঠেছিল ঝাওবনর গাছ উতা চেয়া তারতা জবর নুঙেই লাগেছিল। উবাকা তানুর লগে তা কিতা কিতা কথা টটরাছিল উতা হাব্বিতা কথা তা এবাকা নিঙশিঙ নাউ অর। মেট্রিক পরীক্ষা দিয়া তার আগেই হাঁহিরাম, শশীন, পরেশ তানু হাব্বি পাকরানিরকা বুলিয়া গৌহাটী মহানগরীত আহেছিল। কিন্তু উবাকা গৌহাটীরে মহানগর বুলিয়া নামাতেছিল, হুদা গৌহাটী বুলিয়া মাতেছিল। তানু কটন কলেজে নাঙ ভর্তি করেছিল। তানু বেলেয়া আহানির পিছে তা প্রায় আকখুলাগ অছিল। গাঙহানাত তার ছাত্রবন্ধু কমেই আছিল। শশীন আছি বেলেয়া আহানির পিছে তা হেম, ভৃগু, কণি, রবীন বার শঙ্করর লগে বন্ধুত্ব করেছিল। তার মনে কণির নাঙহান আকতা আহেছিল। কণি বার রবীন এবাকা ডাক্তার অইলা। ভৃগু বৈশ্য মাষ্টর অইল,-- শঙ্কর কলেজর প্রোফেসরগ অইল, হেমে খাদী বোর্ডর কামে হমাছিল। মেট্রিক পরীক্ষা পাশ করানির পিছেদে হাব্বিয়ে তার লগে

গাঙহান এৰাদিয়া আহেছিল। ভূগু বৈশ্যই ইংৰাজীত অনাৰ্সল বি, এ, পাশ কৰিয়া তা পাকৰেছিল ইন্স্কুল উগতেই মাষ্টৰগ অইল। মাষ্টৰগ মানে পয়লা শ্ৰেণীৰ শিক্ষকগ। ভূগুয়ে কিন্তু গাঙহান এৰা নাদেছিল।

(২)

তা অউ গাঙ উহানাত গিয়া কণি, ভূগু বার হেমৰ লগে প্ৰতিযোগিতা কৰানিত পড়েছিল। তানু আছিলাতায় “ক” শাখাৰ ছাত্ৰ। “খ” শাখাৰ বা “গ” শাখাৰ ছাত্ৰই ক শাখাৰ ছাত্ৰাংত বাৎসৰিক পৰীক্ষাত নিয়াম নম্বৰ পেইলে উতাবে ক শাখাত আনানি অছিল। বার ক শাখাত কম নম্বৰ পেইতারা উতাবে খ বা গ শাখাত দিয়া পেঠানি অছিল। স্কুলগ মুটামুটি ডাঙৰেই আছিল আৰতা স্কুলগত হুদা মুনিশৌয়ে পাকৰেছিল। জেলেইশৌ মুঠেই নেয়ছিল। পিছেদে জেলেইশৌৰ স্কুল আগ হংকৰেছিল। মুনিশৌৰ স্কুলগত তিনহান কৰিয়া শাখা আছিল। তা য়েবাকা নবম শ্ৰেণীত কাইল উবাকা খ শাখাৰ মহেশে তারাংত নিয়াম নম্বৰ পাছিল। উহানৰকা বুলিয়া মহেশে ক শাখাত আনানি অছিল। আৰতা মহেশ বুলিয়া আৰাক আগ আছিল, মানে মহেশ মহন্ত। মহেশ মহন্ত খানি অহংকাৰীগ আছিল বুলিয়া বন্ধু বান্ধবৰ হাদিত গুজব আহান রটেছিল। কিন্তু তা মহেশৰ অহংকাৰৰ কুন নমুনা নাদেহেছিল। ভূগু সব সময় প্ৰথম শ্ৰেণীত-আৰতা তা প্ৰথম অয়াই আছিল। নবম শ্ৰেণীত গিয়া মহেশ দুই নম্বৰ ফাম উহান পেইলগা - নবম শ্ৰেণীত তা বার স্টেপ আহান তলে লামিল- মানে তিন নম্বৰ ফাম উহান পেইল। প্ৰগতিশীল গাঙ উহানাত হবা ছাত্ৰৰ লগে ফেৰ মারানিত যিভেগা তারতা বহু দিন লাগেছিল। তার পৰিচিত মতিয়ৰ রহমানে তারাং চিঠি আহান লেখেছিল - রহমান ডুমুনি চকী হাই স্কুলৰ ছাত্ৰগ। উবাকা ভেধগৰ হাই স্কুলগ। উবাকা স্কুল উগত বি, এ, পাশ কৰেছি মাষ্টৰ বুলতে হুদা ধৰণীধৰ ডেকা উগই আছিল। ধৰণীধৰ ডেকাৰ আগে অউ স্কুলগত প্ৰধান শিক্ষকগ আছিলতায় দিনমনি বৰা। তা ফিলসপি বাগাদিল। স্কুল উগত বি,এস,সি, মাষ্টৰ আগউ নেয়ছিল। মেট্ৰিক পাশ কৰিয়া পদ্ম ডেকায় অঙ্ক বাগাদেছিল। উহানে তা বিমোৰেউ পড়েছিল।

তা বুলতে ভবেশ -হবা স্কুল আগত পাকরানি মনেয়া গাঙ এহানাত আহেছিল। মাণ্ডে গেলেগা ভবেশে আসামৰ ম্যানচেস্টাৰে পাকরানিত আহেছিল। তা মতিয়ৰ রহমান বার শশীন শৰ্ম্মাৰ ডেকি ছাত্ৰগ। অউ সময়ত মতিয়ৰ রহমানে তারে উৎসাহ দেনিৰকা চিঠি আহাব ইকৰেছিল। উহানাত ইকৰেছিলতায় - তি হবা স্কুলে নাঙহান ভৰ্তি কৰলেগা, চেইস, কত্থহানলেটাৰ পেয়া তি মেট্ৰিকহান পাশ কৰে পাৰতেই। মিতে এপেইৰ ভেধগৰ ইন্স্কুল এগন্ত মেট্ৰিক পৰীক্ষাহান দিতৌ। মোৰ ঘৰৰ অবস্থাতে তি হাৰপাছত নাই। বাবা দৌ অনিৰ পিছে ইমায় মানুৰ ঘৰে কাম কৰিয়া যে চউলগি পেইরী

অউ চউল অউগিল কুনমতে খেয়া নাখেয়া দিন যাপন কৰিয়ার।

কিন্তু দেহিয়ার ভগবান এগই নেই মানু উতার গজেদেউ এসাদে দৃষ্টিদেৰ যে ভগবান নেই এহান মাতে নুয়ারিয়ার। লেইরাপা মতিয়ৰ রহমানে মেট্ৰিক পৰীক্ষাত অঙ্করমা একশত একশ পাছিল। উহানে তা বৃত্তিও পাছিল। অউ বৃত্তিৰ রূপারে তা কটন কলেজের ডেকি কলেজ আগত পাকৰে পাৰেছিল। কটনে তা অঙ্কত অনাৰ্সল পাকৰেছিল। অনাৰ্সে নাঙ কৰিয়া পাশ কৰেছিল আৰ বার বৃত্তি পাছিল। উহানৰ পিছে তা গৌহাটী বিশ্ববিদ্যালয়ে অঙ্কল এম,এস,সি,পাকরল। এম, এস, সি,পৰীক্ষাত প্ৰথম শ্ৰেণীত প্ৰথম অইয়া পাশ কৰল। তার পিছে মতিয়ৰ কানাডাত গিয়া গণিতে পি, এইচ, ডি, কৰিয়া ডক্টরেট অইল। অউপেইতেই অধ্যাপনা কৰিয়া থাইল। বিশ্বৰ নাঙ কৰা গণিতজ্ঞরমা মতিয়ৰ রহমানউ আগ। উতা বুলিয়া মতিয়ৰ রহমান তা জৰম অছিল ডুমুনি চকি গাঙ উহান না পাছরল। বছৰে বছৰে নুয়ারলেউ দি বছরেতে যেসাদেউ আকখুৰুম আহেৰ। উপেই তা গাঙৰ গাভুড়াপুয়েই পুৰিজলেই উতাবে উৎসাহ দিয়া মাতের - চেষ্টাৰ অসাধ্য কিতাউ নেই- অধ্যয়ন বার অধ্যাপনা এহান জীবনৰ ব্ৰতহান কৰিয়া নেনা লাগতই। উহান অইলে তি পৃথিবীৰ যেপেইতৌ থাক, সুফল উহান শ্বৈনেই পেইতেই।

কিন্তু খানি আহান দুঃখৰ কথাহান, মতিয়ৰ রহমানে চিঠিহান তারে যেসাদে ইকৰেছিল ভবেশে কিন্তু মেট্ৰিকহান উসাদে পাশ কৰে নুয়ারেছিল। রহমানৰ ডেকি অঙ্কত একশরমা একশ পানারকা কঠিন অঙ্ক আহান কৰাত যিভেগা আধা আধি প্ৰশ্নৰ উত্তৰ থা পড়েছিলগা, উহানল মেট্ৰিক পৰীক্ষাত তা অঙ্কত কুনমতে ঘাইটৰ ঘৰে নম্বৰ পেইয়া পাশ কৰেছিল। (চলতে)

৪০৪



লেখক পৰিচিতি -ডঃ ভূগু মোহন গোস্বামী অসমীয়া সাহিত্য জগতৰ অতি পৰিচিত নাঙ আহান। A study of the Ojapali Art Form of Assam নাঙৰ গবেষণা মূলক লেৰিক উহানৰকা গৌহাটী বিশ্ববিদ্যালয়ে গিৰকৰে ডক্টরেট ডিগ্রী দেহিতা। উহান বাদেউ ডঃ গোস্বামীৰ The Ramayon Gowa Ojapali of Assam গবেষণা মূলক লেখা উহানৌ বিদগ্ধ সমাজে বহু প্ৰশংসা পাছে। মুখ্যতঃ লোক সংস্কৃতিলো গবেষণা কৰিয়া থাইলেউ, ডঃ গোস্বামী অসমীয়া শব্দ বার মুদ্ৰন মাধ্যমে প্ৰকাশিত অসমীয়া সাহিত্যৰও নিষ্ঠাবান গবেষক আগ। ডঃ গোস্বামীয়ে অসমীয়া লোক সংস্কৃতিলো লেৰিক

বার প্রবন্ধ ইকরানির গজেউ গল্প, নাটক, জীবনী মূলক প্রবন্ধ, কবিতা আদিলো ষিকুরিহান লেরিক ইকরেছে। গিরকর সদ্য প্রকাশিত জীবনী মূলক উপন্যাস “গোসাইর লরা” লেরিক উহান বিষ্ণুপ্রিয়া ঠারে অনুবাদ করানির যাথাং পেয়া মি নিজরে ধন্য মনে কররি।

৪০২৪

কিতা কৈলে ডাঙোর

কবি বীরেন্দ্র কুমার সিংহ, তিনখাল।

হৌপাং বেছেলেউ মৈলাং
ব্যবসা করানি নুইলাং
কিহান করলে ডাঙোর আমি।

সেলকম বেছেলেগাউ
পেইলাং গোয়াল নিঙ্কুউ
যেহান কৈলেউ তলৈলাং আমি।

পারৌ থৈলেউ মাতলাং মাং
অট পুছিয়ার বপা বপীরাং
কতিয়ৌ চাংখল আমারাং আমি।

শৌজিপুত জিনা পাতুয়া নুইলাং
করিয়ার বুলিয়া তুলছা কাম
নুইলাং দ্বি-পয়সা অইজা করানি।

দিতেই থাইলাং বেরুৱাং
আনানিৎতে নেইলাং
কতিয়ৌ বুদ্ধিত চৌহাত্তা আমি।

মাঙে গমে থৈলো আঙে
খৌনাং টিপেয়া যাতেয়া ফঙে
কুনদিন ঘর্সেঙেতাঙাই আমি।

লেইরা হানাদেউ টাঙৈলাং
পিনিংশি মরগ দেনাং পৈলাং
ঠৈগযিতেগাউ ফুঙ্কার রাজা আমি।

৪০২৪

বেয়াপার সময়

কুমকুম সিংহ

সময় আকগরকাউ বাসেয়া নাউ থার। বার আত্মম গিয়া পরলেগা আর আলথক অয়া নাহের।

সময় এহান আচানকহান। সময়রাং কোন ভেদাভেদ নেই। ধর্ম-বর্ণ, কনাক-বুড়া, জেলা-মুনি, লেইরা-বরা হাবিরকা সময় আকহান। অতীত, বর্তমান বারো ভবিষ্য-সময়র এরে তিনো ভাগ। হাবিরকা কেলেন্ডারর তারিখ, দিন, বার, বছর আকতা ঘড়ির কাটাগৌ আকতা। কোন আগর ঘড়িগ আগ পিচ চলে আমি ঘড়িগ স্নো বা ফাস্ট চলের মাতিয়ার। ঘড়িগয় সময় গন্ডগোল করলে ঘড়ির মাকানিকরাং হংকারানরকা দিয়ার। নিয়াম বেসেপ অইলে গড়িগ উরা বেলা দিয়ার। রূপা পয়সা ঘুস দিয়া সময় কিনানি নুয়ারতারা। সময় এহান কিনানি নুয়ারিয়ার এহানেই সমস্যাহান। নাইলে আমি বেয়াপা হাবিয়ে হিন দুক পেয়া অইলেউ বা হেয়ক লকেইর পকেট চাফাই করিয়া অইলেউ মাহহান লেহে রূপা খানি তিলকরিয়া সময়খানি খানি লয়া গডরেজগোত লুকেইয়া থইলাং অইছ।

এবাকা প্রশ্নহান অইলগাতায় হুদা বেয়াপায় কিয়া সময় কিনানি বারো মুনিয়েতে কিয়া না কিনানি? উত্তরহান অইলগাতায় যে-আমার বেয়াপাতার জিঙে সময়র নিয়াম অভাব। যে বাকাউ বেয়াপার থতাত হুনিয়ার-হায়, সময় না পেয়া। বেয়াপায় চাকুরী বা বাইরর কাম করলেউ গরর কামেস্ত মুক্তি পানার উপায় নেই।

আমার সময়র অভাব এহান কমানি লাগতৈ। নাইলে কতদিন পিছেদে আগয় আংকরলে-‘কয় ঘটাত দিন আহান?’ বুঝে-‘দশ ঘটায় দিনাহান’ মাতাঙায়। এবাকা আমার উদ্দেশ্যহান অনা থক যে আহৌ ঘটায় কিসাদে দিন আহান করানি।

বিশেষ কতহান কারণে সময়র অভাব অর। আহান কারণ অইলতায়-বুদ্ধির অভাব। যেমন, আকেইগি বেয়াপায় কম সময়ে নিয়ামপারা মেঠেল রাদানি পারতারা আকেইগিয়ে বারো এরেসমান মেঠেল এতা রাদতে নিয়ামপারা সময় লাগেইতারা। আমি মাতিয়ারতায় আকেইগি ঠিল। কিন্তু উহান কারণহান নাইগে। কারণহান অইলগাতায় রাদানিতৌ বুদ্ধি লাগের। যেমন, আগদে কুকারগত হৌ আকতা বহেইতে ঔগদে আকতা জুগুত করানি, জ্বিগ আপ্পানে খালি না থনি ইত্যাদি। বারো সময় আহানাত কতহান কাম করানি। ‘বাতে হমাছে’ বুলিয়া সৌর পাকপ্রানি না চেইলে না চলতৈ। হৌরকর সেবা করতেগা সৌগ কাদিয়া থাইলে নাইতৈ। বারো আমি মালক লকেইয়ে সৌ হংকরিয়ার বুলিয়া, বানা পেইয়ার বুলিয়া, সৌ

পাকরতারা বুলিয়া, তানুরে কাম করানি নাদিয়া নিজে মরিয়া মরিয়া তানুরহাষি কাম করিয়ার। আমার এরে স্বভাবহান এরেদেনা লাগিতৈ। এহান সৌরে বানাপানিহান নাইগৈ। এহানাত সৌর লাভর সারুক ক্ষতি অর। আমারতাউ দেহপাত অর।

আরাক সময়র চর আগ অইলতায় টি, ভি, র সিরিয়েল ঔতা। আকেইগী বেয়াপায় টি, ভি, র চেনেল ঔতা বদালেয়া আহানর পিসেদে আহান সিরিয়েল চেইতে থাইতারা। আপ্পানে মুরগ খেচুরিগ করিয়া কিতা কানা? হবা চেয়া আগ দুগ সিরিয়েল বাছিয়া চেইলে সময় খানি আতে থার। বুড়া-বুড়িয়ে টি, ভি, চেয়া সময় কাটেইলে খাটের। কিন্তু দায়ীত্ব আছে মানুরতা এসাদে করানিহান সময় নষ্ট করানিহান সারুক আরতা কিতাউ নাইগৈ। বুদ্ধিমতি বেয়াপায় নিজরকা সময় খানি খেইকরে থাইতারা। এরে সময়হান তানু হবা কামে খরচ করতারা। হাষি সময় উনি - 'মি কালি মরতে পারে' এহান খালকরিয়া হাষিকাম আপ-টু-ডেট করিয়া থনা থকর। কথাহান মোরতা নিয়াম পছন্দ নাউ অছিল। কিন্তু হাদি এহান মোরতা পথ দুর্ঘটনা আহান অয়া গেলগা। এরে পথ দুর্ঘটনা এহানাত মরানিও পারলু অইছ। কিন্তু কপাল হবা অইতেগা জিংতা অইলু। এবাকা খালকরুরিতায়, 'মোরতা কিহান আহান অইলে সৌগি বাহিয়া গেলাগা অইছ। হানতে এবাকা মি কোন কাম পিছেকারকা না থয়া, পারলে আজিয়েই করিয়া থনা মনাউরি। প্রত্যেক মুহূর্তর সদ্যভার করানি মনাউরি। ভবিষ্যতর গজে ভরসা করানি না মনাউরি। বর্তমান এহান মোর আতে আছেহান। এহান কিসাদেকামে খাটানি এহান মোর লক্ষ্যহান। ভবিষ্যতর ভরসা নেই।

অবশ্য আমার জীবন এহান হুদা সৌম্যারারকা নাইগৈ। সমাজর প্রতিও আমার দায়বদ্ধতা আহান আছে। আমি হাষিয়ে সমাজর উন্নতিরকা খানি সময় দিলে সমাজহানর উন্নতি যেসাদেউ অইতৈহান - এহানাত কোন সন্দেহ নেই।

৪০৪৪

কর্তব্য

ব্রজগোপাল সিংহ, তারাপুর, শিলচর



কর্তব্যর অর্থ ব্যাপক। বিভিন্ন জাত, বিভিন্ন পরিবেশে কর্তব্যর অর্থ বিভিন্ন দেহিয়ার। উহানে সার্বভৌম ভাববোধক শব্দর ডেকি কর্তব্যর শব্দ এগর স্পষ্ট সংজ্ঞা দেনা অসম্ভব। কর্মজীবনে ঔতার পরিণতি বারো ফলাফল চেয়াই আমি ধারণা আহান করে পারিয়ার মাত্র। এহান করানি থক বুলিয়া ধারণা অইলেই ঔ কর্ম ঔহান করে পারিয়ার। মুসলমানে মাস্তারা তানুর কোরানে যেহান মাতেছে ঔহানেই কর্তব্য। হিন্দুয়ে মাস্তারা বেদে যেতা যেতা মাতেছে ঔতা হিন্দুর কর্তব্য। খ্রীষ্টানে মাস্তারা বাইবেলে যেতা যেতা মাতেছে ঔতা খ্রীষ্টানর কর্তব্য। সুতরাং দেহিয়ার, জীবনর বিভিন্ন অবস্থাত, ইতিহাসর বিভিন্ন যুগে বারো কিসিম কিসিম জাতর ভিতরে কর্তব্যর ভাব ভিন্ন ভিন্ন।

আমার মুঙে যেবাকা ঘটনা খানি ঘটের, স্বাভাবিক বা পূর্ব সংস্কার অনুসারে আমার হাষিরতা কুন বিশেষ নমুনা আহানলো কর্ম করানির ভাব উদয় অর। মনহানে ঔবাকা ঔ কর্ম উহান করানির চিন্তা করানি অকরের। কিন্তু যে পরিস্থিতিৎ কর্ম আহান সঙ্গত মনে অর অন্য পরিস্থিতিৎ ঔ কর্ম উহান অসঙ্গত মনে অর। প্রত্যেক সৎ ব্যক্তিয়ে নিজর বিবেকমতে কর্ম করতারা। কিন্তু কুন গুণহানে কর্মরে কর্তব্যত পরিণত করের। খ্রীষ্টান আগরাং গোরুর মাংস তার খাদ্য, হিন্দু আগরাং ঔ গোরুর মাংস অখাদ্য। মানু আগয় মানু আগরে গুলি করিয়া মারলে অন্যায় বুলিয়ার, কিন্তু সিবেই আগয় যুদ্ধত আহৌগ মানু গুলি করিয়া মারলে উহানরে সাবাসি দিয়ার। এহানে পরিষ্কার অর যে, কিহান করলু উহানলো কর্তব্য নির্ধারণ নার।

সুতরাং ব্যক্তিনিরপেক্ষ অয়া এহান কর্তব্য, ঔহান অকর্তব্য নির্দেশ করানি নার। তবে ব্যক্তি বা আধ্যাত্মর দিকলো কর্তব্যর লক্ষণ বিচার করে পারিয়ার। যে কর্ম আমারে ভগবানর কাদাদে নেরগা ঔতা সৎ কর্ম বারো কর্তব্য। যে কর্মে আমারে ভগবানরাংত দূরেই করিয়া নেরগা ঔতা অসৎ কর্ম বারো অকর্তব্য। কিন্তু সর্বাবস্থাত হাষি ব্যক্তিরতা কি কর্মত কি ভাব আইতই ঔহান নিশ্চয় করিয়া মাতে নুয়ারিয়ার। তবে, হাষি যুগে, হাষি দেশেউ, হাষি সম্প্রদায়েউ কর্তব্য সম্বন্ধে ধারণা আহান একবাক্যে স্বীকার করেছি, ঔহান তলর শ্লোকার্থত আছে -

“ পরোপকারঃ পুণ্যায় পাপায় পরপীড়নম্।

ভগবদগীতাৎ বর্ণাশ্রম অনুসারে কর্তব্যর কথা বারে বারে মাতেছে। বিভিন্ন কর্মর প্রতি কারতা কি মনোভাব অইতই, ঔহান ঔ ব্যক্তির বর্ণ, আশ্রম বারো সামাজিক মর্যাদা অনুসারেই অনেকহান নিরূপিত অর। এহান আমার কর্তব্য, যে সমাজে আমি জরম অছি, ঔ সমাজর আদর্শ বারো কর্মধারা অনুযায়ী কাম করানি যেতালো আমার জীবন উন্নত বারো মহৎ অর। কিন্তু এহান মনে থনা লাগতই যে হাবি সমাজে বারো হাবি দেশে একই কর্মধারা বারো আদর্শ প্রচলিত নাগই। মার্কিন আগরাং তার দেশর রীতি-নীতি বারো কর্মধারা আদর্শ, যেগয় ঔ রীতি-নীতি কররমধারা অনুসরণ নাকরের ঔগ দুষ্টগ। ভারতবাসী আগয় খালকরের তার রীতি-নীতি, কর্মধারা শ্রেষ্ঠ বারো আদর্শ, বারো ঔতা অনুসরণ না করের ঔমানু ঔগ দুষ্টগ। তারো আগরে আগয় দেহে নুয়ারিয়ার অর্থাৎ সহ্য করে নুয়ারিয়ার। উহান আমার পরস্পর সহানুভূতির অভাব। এহানে কুন মানু আগর কর্তব্য বিচার করতোগা, ঔমানু ঔগর আহিলো তার কর্তব্য বিচার করানি লাগতই। মানু আগ বিশ্বজগতর মাপকাঠি অনা নুয়ারের। মানু ঔগরতা বিশ্বজগতর লগে সামঞ্জস্য থয়া চলানি লাগতই। পরিবেশ বিশেষে যেতা করানি থক ঔতাই শ্রেষ্ঠ কর্ম বারো ঔতাই কর্তব্য। পয়লা জন্মগত অধিকারে কামকারানি, দ্বিতীয়ে সমাজে পদমর্যাদা অনুসারে যেতা কর্তব্য ঔতা করানি।

যেবাকা কর্মর পিঠিৎ স্বার্থজরিত নাথার ঔবাকা মানুয়ে শ্রেষ্ঠ কর্ম করে পারতারাতা। ঔ অবস্থাত কর্ম উপাসনার স্বরূপ অর। কর্মরকা কর্ম। এহান সাধনাহান।

কর্তব্য হদায় রুচিকর নাগই। কর্তব্য চক্র এগরে প্রেমবোধলো তিঙা পারলেই কর্তব্য সহজ অর। অন্যথায় কর্তব্যত সংঘর্ষ দেহা দেব। প্রেমমিশ্রিত অনায় মালক-বাপকে জিপুতর প্রতি, জিপুতে মালক-বাপকর প্রতি, হেয়কে মৈলকর প্রতি, মৈলকে হেয়করপ্রতি, বিনা বিরক্তিলো বানা-নুঙশিলো কর্তব্য পালন করে যিতারাগাতা।

জগৎ এহানাং মালকর ফামহান হাবির গজে। কারণ মালক এগ নিঃস্বার্থর প্রতীক। একমাত্র ভগবৎ প্রেমই মালকর প্রেমর গজে। তারো, ঔ মানব উগই ধন্য যেগয় ইমা-ইন্দলরে ভগবানর মাতৃভাবর প্রতি মূর্তিগ করে নিংকরে পারের। ঔ নারী উগৌ ধন্য যেগয় পুরুষ আগরে ভগবানর পিতৃভাবর প্রতিমূর্তিগ করে খালকরে পারিরী। ঔ জিয়া-জিপুত ঔতাউ ধন্য যেতায় ইমা বাবারে পৃথিবীৎ প্রকাশ অছে ভগবানর সত্তাগো বুলিয়া দেহে পারের।

উন্নতির একমাত্র উপায়হান আমার আতে আছে কর্তব্য এতা করে করে ক্রমশঃ শক্তিলাভ করানি, যেবাকা পেয়া আমি হাবির গজর ফাম ঔহানাং গিয়া ফৌয় নুয়ারেছি। নিক্কা আবোল - তাবোল বকের অধ্যক্ষ উগরাংতো ঔ মুচী উগয় ডাঙর - যেগই কম সময়ত হব্বা জুতা জোড়া আহান

হংকরে দিয়া পারের। এহানে কর্মর রহস্যহান। “ যন্ সাধন তন্ সিদ্ধি। অর্থাৎ যেবাকা কুনকাম করিয়ার উবাকা অন্য কুনতা না খালকরিয়া পূজাহান নিংকরিয়া ধরেছি কাম উহান লমকরানি বারো ঔ সময়ত ঔ কামে মন প্রাণ সমর্পিত থনা।

যেবাকা হাবি কর্মত ক্রমাগত বিরক্তি প্রকাশ অর উবাকা হাবি কর্মই অরুচিকর লাগের। কর্তব্য কর্ম করতে হারৌ নাইলে জীবনে সফলতা নাহের। যে কুন কর্তব্য মুঙে আইলে উতা সাগ্রহে যেন করে পারিয়ার - কর্তব্য সম্পাদনরকা মনে প্রাণে সদা প্রস্তুত থা পারিয়ার, উহান অইলেই আমি মিঙাল দেহানিং সক্ষম অইতাঙাই।

অনাসক্ত অইয়া কর্তব্য কর্ম করে পারলে জ্ঞান আহরণ করে পারিয়ার। এহানাং যারি আহান মনে আহিল - সন্ন্যাসী আগ বার বছর কঠোর যোগাভ্যাস, ধ্যান-ভজন, তপস্যার পিছেদে গাছ আকঝারির তলে বয়া আছে মাপা উগত গাছ ঝারিত হুকানা পাতা কতহান তার মুরগৎ পড়িল। গজেদে চেয়া দেহের বগা আগয় বারো কওয়া আগয় কৌলি লাগেছি। দেহিয়া পিংক ছৌয়েল। মাতের - “ উসিং নাকরেছ ? মোর মুরগৎ হুকানা পাতা বেলেইল সাহস কুংরাংত পেইলাইতা ? ” বুলিয়া খা করিয়া পাহিয়া ঔগির উবেদে দৃষ্টি দিতেই পাহিয়া দ্বিগি ভস্ম অগেলাগা। সন্ন্যাসী উগয় তার ক্ষমতাহান দেহিয়া জবর আত্মতুষ্ট অইল। খানি পিছেদে ভিক্ষা করানিরকা গাঙেদে গেলগা। ঘর আগর মুঙে উবা অইয়া, “ ইমা, মোরে ভিক্ষা গুলি দে ” বুলিয়া মাতিয়া ভিক্ষারকা বাছেয়া থাইল। ঘর ভিতরেত উত্তর আহিল, বাবা ! খানিক বাছা। সন্ন্যাসীগয় মনে মনে গুজুরের, “হতভাগিণী, তোর এমাটক স্পর্ধা। মোরে বাছানিরকা মাতুরিতা। মোর ক্ষমতা তি হারনা পাছৎ।”

ঘর ভিতরেত ঘর গিথানিয়ে বারো মাতলি - “ বাবা ! এমাটক অহংকার নাকরি। এপেই বগা বারো কওয়া নেই। সন্ন্যাসীগ আচরিৎ অইল। তা আচানক অইয়া বাছেয়া থাইল। খানি পিছেদে ঘর গিথানি নিকুলিয়া আইলি। সন্ন্যাসী উগ, ঘর গিথানি উগর জাংহানাং ডিগলগ অইয়া পড়িল। আংকরলো - “ ইমা! তি ঘরে থায়া গাঙেত দূরেইৎ বিয়ানে ঘটেছে ঘটনা উহান কিসাদে হারপেইলেতা ? ”

তেই মাতলি - “ বাবা মি তোর যোগ, তপস্যা, কিত্তাউ নাজানু। মোর হেয়ক নুয়ারাগ। মি তার সেবা করিয়া আছিলু, উহানে তোরে খানিক বাছা বুলেছিলুতা। সারা জীবন মি মোর কর্তব্য করিয়া যাউরিগা। বিয়ার আগে, ইমা-বাবার প্রতি জিলকর কর্তব্য পালন করেছ। বিয়ার পিছেদে হেয়কর প্রতি মৈলকর কর্তব্য পালন করিয়া যাউরিগা। এতাই মোর যোগাভ্যাস। মোর কর্তব্যয় মোরে অন্তর্দৃষ্টি দেছেতা। তি যদি আরতাউ লু কথা হারপানি মনার উতা অইলে, কুশল নগরর বাজার উহানাং মাংস বেছেকুরা আগ আছে তারাং যাগা।

সন্ন্যাসী গিরক ঔ বাজারে গেলগা। দেখল, অতিকায় কসাই আগ মাংস কাপে কাপে বেছের বারো লকুরা উতার

তুলো টটরার। কসাই উগরে দেহিয়া আল্লি পেইল। মনে মনে নিজরে ধিক্কার দিল -হে ভগবান এগরাংত হিকানিৎ পইলুতাক। সম্মাসী গিরক উগয় মনে মনে ভগবানরাং প্রার্থনা জানার -“ ভগবান মোরে রক্ষা কর। পেইরাক্ক তারে চেয়া কসাই উগয় মাতল -“ আপনারে সতীয়ে দিয়া পেঠাছেতা ? খানিক্ক বাছেইক। মি মোর কামহানি আটাবেলেইং। ”

সম্মাসীগ বাছেয়া থাইল। কসাই উগয় তার কামহানি লইকরিয়া ধন-পয়সা আটেয়া সম্মাসীগরে ঘর ভিতরে নিয়া বহুয়েইলগা। বহুয়েইয়া, তা তার মালক -বাপকর জাং আত দনা পুছানি লম করিয়া সম্মাসীগর কাদাং আয়া বয়া মাতল - “ এবাকা মাতিক, কিহান মনেয়া মোরাং আহেছিতা ? ” সম্মাসীগয় আত্মা পরমাত্মার কথা আংকরল। কসাই উগয় আত্মা পরমাত্মার গুহ্যতিগুহ্য হাব্বি কথা আলোচনা করিয়া উপদেশ দিল। এ উপদেশাবলী -মহাভারতে “ ব্যাধগীতাং উল্লেখ আছে। এ ব্যাধগীতা এহান বেদান্তর চরম বিশ্লেষণহান বারো দর্শনর চরম সীমাহান।

সম্মাসীগ বিতুলা অইল, আচরিং অইয়া কসাই উগরে আংকরল -“ এতাহাব্বি জ্ঞান থায়াউ আপনে কিয়াকা কসাইর এমাটিক তল কাম এহান করিয়ারতা ? ” কসাই উগয় উত্তরে মাতল -“ কুন কর্মই তল নাগই। কুন কর্মই অসং বা অপবিত্র নাগই। এহান মি জন্মগত অধিকারে পাছু কামহান। একমনে হারৌ অয়া করুরি। লগে ইমা বাবার সেবা, ঘরগৃহস্তি হাব্বিতাউ হারৌ হারৌ অয়া করুরি। এহানেই মোর যোগ, তপস্যা, সাধন, ভজন। এতার ভিতরেদেই মি মোর সিমিত জ্ঞান এতা পাছুতা।

আমার কর্তব্য, অকর্তব্য এতা কাদা বারার অবস্থালো স্থির অর। উহানে কর্তব্য এতাং হুরকাং ডাঙর, লু-তল, বলিয়া কিস্তাউ নেই। আমি স্বীকার করিক বা না করিক আমার কর্তব্য কর্মফল অনুসারে নির্দিষ্ট অর।

কর্তব্য কর্ম করে করে তাপ্প তাপ্প আমি শক্তি আহরণ করিয়ারতা। ক্রমাৎ এসাদে অবস্থা আহানাং আয়া ফৌয়েয়ার যেবাকা আমি সমাজর হাব্বিস্ত গৌরবর কর্তব্য করানির সৌভাগ্য পেয়ার।

৪০২

শ্রদ্ধাজলী



জন্ম

৭ই আশ্বিন, শনিবার
১৩৩৪বাংলা

মৃত্যু

২০ শে আষাঢ়, রবিবার
১৪১৬ বাংলা

পন্ডিত রাধারমন ব্যানাজ্জী, পাথারকান্দি লয়ার গোকিলাত, মালক রজনী ব্যানাজ্জী, বাপক গন্ধরাজ ব্যানাজ্জীর ঘরে জন্ম অছিল। বাপক গন্ধরাজে ব্যাকরণ, জ্যোতিষ, নীতিচার বাগাদেছিল। রাধারমনরে কনাকে বাপকে, চেংকুরিং হালাক নন্দকিশোর মুখোপাধ্যায়রাং লেরিক পাকরয়ানিরকা দিয়া পেঠা দেছিল। রাধারমনরে শিলচর নরসিং হাইস্কুলে ভর্তি করে দেছিল। কিন্তু বিধাতা তার কপালে আরাক আহান ইকরিয়া থছিল। মাত্র তিন মাহা নাযিতেগা, রাধারমনর বাপক দৌ অছিল। রাধারমন গাঙে আলৈয়া আহিল। পাথারকান্দির মডেল এম, ভি, স্কুলে ভর্তি অছিল। ঔপেইংত এম, ভি, পাশ করিয়া ১৯৪৭ ইংরেজীং সংস্কৃত পাকরয়ানিরকা শ্রীধাম নবদ্বীপে গেছিলগা। শ্রীধামে গোবিন্দবাড়িং থায়া শ্রীচৈতন্য চতুষ্পাঠী টোলে ভর্তি অছিল। মাহিলী রূপা ৫ হানর বৃত্তি আহান তারে দেছিল।

১৯৪৯ ইংরেজীং নবদ্বীপে সরকারী সংস্কৃত কলেজ স্থাপনা এলে রাধারমন ঔ কলেজে ভর্তি অছিল। ঔ কলেজন্তই ব্যাকরণতীর্থ বার কাব্যতীর্থ উপাধি লৈয়া, ১৯৫৮ ইংরেজিৎ কাছাড়র যাত্রাপুর হাইস্কুলে শিক্ষকর পদে নিযুক্ত অছিল। ১৯৮৯ ইংরেজীং ঔ স্কুলেত্তই শিক্ষা বিভাগেৎত অবসর নেছিলগা।

১৯৬০ ইংরেজীং হরিনগরর(কুকিটলা) পন্ডিত গোলাপ শর্ম্মার সুযোগ্যা নাতিনক শ্রীমতি মানঘী ব্যানাজ্জীরে ধর্মপত্নী হিসাবে পাণি গ্রহণ করেছিল।

শ্রীধাম নবদ্বীপে থাইতে গিরক গোবিন্দজীউর নিত্য সেবা পূজার সৌভাগ্য পাছিল। ছয়মাহা শ্রীমন্দিরর নিয়ম-নীতির প্রশিক্ষণ দিয়া শ্রীশ্রীগোবিন্দজীউর পূজারী হিসাবে নিযুক্তির মর্যাদা পাছিল।

বিদগ্ধ পন্ডিত রাধারমন ব্যানাজ্জী ১৯৯২ ইংরেজীং শ্রীশ্রী রাধামাধবজীউ সেবা পূজা পরিচালন সমিতির সভাপতির পদফামে বহেছিল। ঔ পদফাম, ২০০৫

ইংরেজী পেয়া দাৰ্ঘ ১৩ বৎসর কাল বিভূষিত করিয়া থছিল। গিরকর যোগ্যতা, কর্মনিষ্ঠা, বিচক্ষণতা, ধর্ম্য বার শাস্ত্রে অগাধ পান্ডিত্য, সহজ সরল মধুর ব্যবহার, সমগ্র বিঃ মঃ সমাজ, বৈষ্ণব ভক্ত মন্ডলী, শ্রীশ্রী রাধামাধবজীউর ভক্ত মানাই হাবিরেই মুগ্ধ করিয়া থছিল, ছন্দা উহান নাগৈ, গিরকর সভাপতিত্বে শ্রীশ্রীরাধামাধবজীউ শ্রীমন্দিরর পুনর্নিমাণ অছিল। বার ১৯৯৪-৯৫ ইংরেজীৎ গিরকর সভাপতিত্বে শ্রীশ্রী রাধামাধবজীউ সেবা পূজা সমিতির যুগান্তকারী সংবিধানহান গ্রহণ করেছিল। চৈ চৈনাং বিঃ মঃ সমাজ এহানরে আকহান চান্দোয়ার তলে ঐক্যতার লুরী আকনালল বাধিয়া থনার বলিষ্ঠ তথা যুগময়ী পদক্ষেপ।

গিরক, বহু পত্র পত্রিকাৎ বহু পান্ডিত্যপূর্ণ প্রবন্ধ, রচনা ইকরানির গজেউ শ্রীশ্রীগৌর গোবিন্দার্চন মঞ্জরী, শ্রীশ্রী গৌরকৃষ্ণ লীলা কীর্তন লহরী, নীতি বাণীশ্রী আদি শাস্ত্রীয় লেরিক করেছিল। যেতায় গিরকর আগাধ পান্ডিত্য, শাস্ত্রজ্ঞান, ধর্ম্যকর্মজ্ঞান, আচার রীতি নীতিজ্ঞান, মানষিক ঔদার্য, উৎকর্ষতার পরিচয় দেয়।

পন্ডিত রাধারমন ব্যানার্জীর বিয়োগে, বিঃ মঃ সমাজে শাস্ত্রজ্ঞ, সমাজর কর্ণধার, রাধামাধবজীউর একনিষ্ঠ, ঐকান্তিক, অক্লান্ত পুংনিং চেলপা কর্মী আগ চিরতরে হারেইলা। ঔ শূণ্য ফামহান কুনোদিন পূর্ণ নাইতৈ।

গিরকর পূণ্য শ্রাদ্ধর দিনে (১৫ই জুলাই, ২০০৯ইং) শরাদে যৌয়য়া স্মৃতি তর্পন দেছিল।

শ্রীশ্রীরাধামাধবজীউ সেবা পূজা পরিচালন সমিতি-প্রতাপগড় আঞ্চলিক কমিটি।

নিঃ বিঃ মণিপুরী মহাসভা-প্রতাপগড় আঞ্চলিক কমিটি।

বিষ্ণুপ্রিয়া মণিপুরী সাহিত্য সভা-প্রতাপগড় আঞ্চলিক কমিটি।

শ্রীশ্রীরাধামাধবজীউ সেবা পূজা পরিচালন সমিতি - কেন্দ্রীয় কমিটি।

৭ই জুলাই ২০০৯ ইংরেজীৎ শ্রীশ্রীরাধামাধবজীউ সেবা পূজা পরিচালন সমিতি -বৃঃ পৌঃ আঞ্চলিক কমিটিয়ে থানাপারাত শোকসভা পাতিয়া গিরকর আত্মার সদগতি বার পরিবারবর্গর শান্তি প্রার্থনা করেছিল।

পন্ডিত রাধারমন ব্যানার্জীর পরধাম প্রাপ্তিৎ, বিষ্ণুপ্রিয়া মণিপুরী মাহেকীয়া পত্রিকা, " অপরূপা " র অপূরণীয় ক্ষতি ঐল। ২০০৭ ইংরেজীৎ অপরূপার তুলো গিরকর প্রথম পরিচয়। অপরূপা হান আতে পেয়াই গিরকে স্বকীয় সহজ সরল শিশু সুলভ চারিত্রিক বৈশিষ্টলো, বার পন্ডিতর জ্ঞান গম্ভীর বাক্যল মাতেছিল - অপরূপাহান অপূর্ব অছে। অপরূপারে মি হাজেইতৌ। গিরকে অপরূপারে হাজানি অকরেছিল।

অপরূপার কনাকশৌর আসর এহান গিরকর হাজপারর মেঠেলহান। অপরূপায় সাষ্টাঙ্গে সহস্র প্রণতি

জানার। গিরকর অমূল্য অবিস্মরণীয় অবদান অপরূপায় নত শিরে ধারণ করেয়।

অপরূপায় হৃদি বিদারিয়া কাংকরের এ শ্রদ্ধাজ্ঞলী। হে উদার কল্যাণকামী মহৎ মানব। অপরূপার এ বিনম্র শ্রদ্ধাজ্ঞলী গ্রহণ করেদিক।

অশ্রুজলে
অপরূপা

কনাক শৌর আসর

পরিচালনাতঃ শ্রী তমাল শর্মা।

আহ তলৈক কনাকশৌ
অয়তারায়া পিছ দৌ।
না আইলে অপরতারায়া
ফারা আঙির খৌ।

প্রমাণ কর / উত্তর দেয়

- ১। ঘর গিথানি, গাতুয়া আহিনী।।
- ২। বুরিয়া বুরিয়া যারগা
যেগর ঘরেউ ভাত খারগা।।
- ৩। কিহানান্ত কিহু অনাত লেপৈলু
বুকে কালি ঘসিয়া জীবন মাংকরলু।।
- ৪। লাঠিগ মি ধরলু, মুরগত জটা বাধলু
সিটর আঙি উরলু, কিগতে লেপৈলু ?
- ৫। হেয়কর ক বেলা, নৌকার বেলা কা
গাছেন্ত ছিড়িয়া দেতা ঘরে খেইমগাতা।
- ৬। খানার বস্ত্র হানতে নাগৈ হাবিয়ে খেয়তারা
বুড়া বুড়িয়ে খেইলে কাকালিত ধরতারা।
যুবক যুবতিয়ে খেয়েলে বারাদে চেইতারা
শৌয়ে খেয়েলেতে মালক কিলেইতারা।
- ৭। কনাকর নাকগ কাপ মালার কাপ লা
লাখীর খীগ কাপ লয়া আনো যেইগা।
- ৮। জেলেই চেয়েলে পূণ্য অর কিসাদে অরহান
দ্বিয়ো আতলো কলকরলে পাপহাবি ককর হান।
চুমা দেনা পারের যেগ তার ঠান্ডা অর দেহাগ
সোনামনি হাবিইয়ে মাত কুংগ ঐলী জেলাগ ?
- ৯। বুকগল আটুরি মি আত জাং নেয়নিয়ে
মাংস নেইয়েলেউ মোরে খেয়তারা হাবি প্রাণীয়ে।
- ১০। খালর ল বেলা টকর বেলা ক
লতার তা বেলা মাতো ঐলু কিগ ?

সঠিক উত্তর পরবর্তী সংখ্যাত।

চিঠি পত্র মতামত

অপরূপার সম্পাদক মহাশয়।

কনাকশৌর আসরের খুতল দিয়া পেঠা দিলু। আগে প্রশস্তি, জাগরণ, হরি সংকীর্তন দিয়া পেঠাছিলু। নিয়াম নিয়ামপারা মেঠেল মেঠেল অপরূপার খুতল যতন করিয়া থেদেছু। উতা হাবি থায়ল আপনার সমুৎসাহী কারেমর গজে। প্রাপ্তি সংবাদ পেইলে নিয়ামপারা হারৌ ঐতৌ। ইতি—

ভবদীয়
শ্রী রাধারমণ ব্যানার্জী।

বিষ্ণুপ্রিয়া মণিপুরী লেইরিক

পূণ্যতীর্থ মণিপুর মাটি	অজা গোলাপ সিংহ	১৫/-
সাড়ে তিন হাত হপন	স্মৃতিকুমার সিংহ	৫০/-
হাকর ঙাল তেরা	নরেন্দ্র চন্দ্র সিংহ	৩০০/-
নীল যমুনার পারে	মণীন্দ্র কুমার	৫০/-
জীবন দর্শন	দৃষ্টিকোণ	৩৫/-
জার্ণাল	ব্রজেন্দ্র কুমার সিংহ	৩০/-
সুদর্শন চক্র	ব্রজেন্দ্র কুমার সিংহ	৩০/-
টোনাটিং	ব্রজেন্দ্র কুমার সিংহ	১০/-
কালিদাসর মেঘদূত	ধনঞ্জয় রাজকুমার	১০০/-
অনুবাদকল্প	ধনঞ্জয় রাজকুমার	৩০০/-
History of Manipur	প্রঃ নামদেব সিংহ	২৫০/-
জ্ঞানর বর্তি	বিঃ মঃ সাহিত্য সভা	২৫/-
হৃন্দ পরিচয়	ব্রজেন্দ্র কুমার সিংহ	১৫০/-
রাজা আইদিপাস্	ধনঞ্জয় রাজকুমার	৫০/-

প্রাপ্তিস্থান - অপরূপা অফিস

মহৎ বাণী (Treasured Quotes)

The true measure of a man is how he treats someone who can do him absolutely no good .
-Samuel Johnson.

মানু আগর আসল মৌওনহান তা মানু আগরে কিসাদে আপ্যায়ন করেব এহান হারপেয়াও যে ও মানু উগোয় তার কুনো আহান উপকার নাউ করতই।

৯০৯৯

Only two things are infinite , the universe and human stupidity, and I am not sure about the former .

-Albert Einstein .

মাত্র দুহান বস্তু অসীম, ব্রহ্মাণ্ড বারো মানুর দুফামি, মি কিন্তু পয়লাকার উহানাং নিশ্চিত নাগৈ।

৯০৯৯

Happiness is good health and bad memory .
-Ingrid Bergman .

নুয়ারা নেই দেহা বারো হবা নেই স্মরণ শক্তিয়েই আনন্দ।

৯০৯৯

The nice thing about egotists is that they don't talk about other people .
-Ucille S Harper .

অহঙ্কারী মানুর হবাহান এহান, তানু পরচর্চা না করতারা।


৯০৯৯



In any contest, contest between power and patience, bet on patience .
-W.B.Prescot .

ক্ষমতা বারো ধৈর্য্যর হাদিৎ সিকনাং ধৈর্য্যর বারাদে বাজী ধর




৯০৯৯

সমাজ দৰ্পণ - ১২৯তম বাৰ্ষিক অধিবেশন, মালিগাও, গৌহাটি, শ্ৰী শ্ৰী ৰাধামাধজীউ সেৱাপূজা পৰিচালন সমিতি









অপৰূপা গ্যালারী

এ মাহাৰ বিজয়ী (উদাহৰণ মাত্ৰ)



শঙ্কৰ সিংহ

৪৭, কুন্ডিল নগৰ পথ

ৰাজগড় ৰোড, গুৱাহাটী, আসাম


পিনঃ ৭৮১০০৭

ফোটোৰ বিষয় মনসুন ২০০৯

কেমেৰা Sony Digital

নিৰ্বাচিত ৩ হান

পুৰস্কাৰ মূল্য ৰূপা ১৫০/- হান




আপনি তুলেছি ফোটো যদি আপনি আমাৰ গ্যালারীত ছাপানি মনেয়াৰ, উহান অইলে কমেও চাৰিহান 3.5" X 6" size ৰ ফোটো তলৰ ঠিকানাত দিয়া পেঠেইক। প্ৰেৰকৰ সম্পূৰ্ণ নাঙ, পোষ্টাল ঠিকানা (পিন কোড সহ), মোবাইল অথবা লেন্ডলাইন নাম্বাৰ দিয়া পেঠানি না পাহৰবাঙ।

কিয়া বুজ্লেতে, আপনাৰ দিয়া পেঠাছি ফোটো যদি ছাপানি অৱ উতা অইলে প্ৰতিহান ফোটোত আপনাৰে ৰূপা ৫০/- হান কৰে দিয়া পেঠানি অইতই।

বিঃ দ্ৰঃ চাৰিহানৰ গজে ফোটো, অপৰূপা গ্যালারীত ছাপানি নাইতই। ফোটো ই-মেইলেও দিয়া পেঠানি ইয়াকৰে। aparupasahitya@gmail.com

-প্ৰকাশক, অপৰূপা



অপৰূপাৰ নিয়মাবলী

- ১/ “অপৰূপা” সাহিত্য সংকলনহানৰ দাম প্রতি সংখ্যা রূপা ২৫ হান।
- ২/ সংকলনহান ডাকযোগে দিয়া পেঠানি ঐতৈ।
- ৩/ সংকলনহানৰ দাম (তিন মাহা / ছয় মাহা / বছৰ আহান) অগ্রীম দেনা লাগতৈ।
- ৪/ সংকলনহানৰ দাম Cheque/Draft/ M.O./Cash দেনা পারতাঙাই।
- ৫/ গ্রাহকৰ নাঙ, ঠিকানা গাঙৰ নাং / শহরৰ নাং / পথৰ নাং / ঘরৰ নম্বর / পোষ্ট অফিস / পিন নম্বর / টেলিফোন থাইলে টেলিফোন নম্বর দিলে সংকলনহান দিয়া পেঠানিত সুবিধা ঐতৈ।

- ১/ বিজ্ঞাপনৰ বিষয়বস্তু Logo / Design/ Literature পরিষ্কার করে ইকরিয়া বা ছাপেইয়া দিলে হবা।
 - ২/ বিজ্ঞাপনৰ মাশুল অগ্রীম দেনা লাগতৈ।
 - ৩/ বিজ্ঞাপনৰ মাশুল
- | | ভাগ | রূপা |
|--------------------------|----------------------------|---------|
| হাদির যে কোন পৃষ্ঠা আহান | | ৫০০ হান |
| হাদির যে কোন পৃষ্ঠা আহান | পৃষ্ঠার দুই ভাগৰ ভাগ আহান | ২৫০ হান |
| হাদির যে কোন পৃষ্ঠা আহান | পৃষ্ঠার চারি ভাগৰ ভাগ আহান | ১০০ হান |

‘অপৰূপা’ত লেখা দিয়া পেঠানিৰ নিয়মাবলী

- ১/ লিখা পরিষ্কার ডাঙৰ আখরে, আক পৃষ্ঠাত ইকরানি লাগতৈ।
- ২/ অমনোনীত লেখা ফিরং পানারকা উপযুক্ত ডাক মাশুল দিয়া নাং ঠিকানা ইকরা খাম আগ দেনা লাগতৈ।
- ৩/ মনোনীত লেখা সংকলনহানাত ছাপলে ঐ লিখা ফিরং দেনা নাইতৈ।


সর্বপ্রকার সম্পর্করকা
M.K. Sinha, IFS (Retd.)
Rajgarh Road, West by lane - 12
Kundil Nagar, House No. - 47
Guwahati - 781 007
☎ : 2524841

মণীন্দ্র কুমাৰ চন্দ্ৰ
পরিচালক



ফলেই

৪৭- রাজগড় রোড, ওবেষ্ট বাইলেন-১২, কুঙিল নগর, গুৱাহাটী - ৭৮১০০৭, ফোন - ২৫২৪৮৪১



উত্তর-পূব ভাৰতে বিষ্ণুপ্ৰিয়া মণিপুৰী হস্ততাত- বস্ত্ৰশিল্পৰ একমাত্ৰ দোকান। অসম, বাংলা, মণিপুৰ, নাগালেণ্ড, মিজোৰাম, অৰুণাচল, উড়িষ্যা, উত্তৰ প্ৰদেশ, হৰিয়ানা, কাশ্মীৰ, হেণ্ডলুম বাৰো হেণ্ডিক্ৰেফটৰ নিৰ্ভৰযোগ্য দোকান। ১৯৯৬ ইংৰেজীৱ জাতীয় সেৱাত ব্ৰতী আছে।

An Outlet of North-East Women's Welfare Society-Assam

বিষ্ণুপ্ৰিয়া মণিপুৰী ঠাৱৰ লেৱিক-লাইছো, পত্ৰ-পত্ৰিকাৰ একমাত্ৰ গ্ৰন্থাগাৰ।

পৰিচালক
ফলেই

Culture Handloom, Habit Handloom Support poor womweavers of the North-East
Culture Writing, Habit Reading Support Mother Tanguie, Serve the People

Management
Phalei